

如臯縣志卷十六

列傳一 人物 儒林 孝友 忠烈

天地有正氣人得天地正氣鼓盪流行經緯萬端蒼萃衆美其扶植綱常爲忠臣義士爲孝子順孫卽至艱難挫折終行其志不可抑損是臯邑中眞足不朽者他若克自表見雖一材一藝亦錄其長以風示來茲志列傳

人物

魏陳矯字季弼廣陵東陽人也太守陳登辟爲功曹郡爲孫權所圍登令矯求救於曹操矯說操曰鄙郡雖小形使之國也若蒙救援使爲外藩則武聲遠震矣操奇矯欲留之矯辭曰本國倒懸故奔走告急縱無申胥之倣

如臯縣志

卷十六

列傳一

一

敢忘宏演之義乎操乃赴救吳軍退操辟矯爲司空掾歷官司徒卒諡貞侯

吳呂岱字定公少爲郡縣吏避亂南渡孫權召署錄事出補餘姚長募精健千人平定會稽東冶五縣賊拜昭信中郎將建安二十年督孫茂等十將從取長沙三郡克之遷廬陵太守延康元年爲交州刺史討平桂陽滇陽賊王金遷安南將軍假節封都鄉侯會交趾太守士燮卒子徽逆命擊破之進封番禺侯岱既定交州復進討九眞斬獲以萬數進拜鎮南將軍黃龍三年武陵蠻獍叛岱與太常潘濬共討定之嘉禾四年討平廬陵會稽東冶南海諸賊廖式作亂零陵蒼梧鬱林諸郡騷擾岱

拜表輒行星夜兼路攻討一年郡縣悉平時年已八十遷上大將軍拜大司馬岱清身奉公初在交州歷年不餉家妻子困乏權聞加賜錢米布絹歲有常限年九十六卒子凱嗣遺令殯以素棺疏布巾襦葬送之制務從儉約凱皆奉行之墓在縣東南六十里

宋胡瑗字翼之少有氣節顓意經學兼通歷律之法景祐初更定雅樂詔求知樂者范仲淹以瑗薦白衣對崇政殿授試秘書省校書郎時年四十餘矣康定初元昊寇邊仲淹經略陝西辟丹州推官後移密州觀察推官丁父憂舉其族之亡於遠者九喪歸葬服除遷保寧軍節度使推官教授湖州召教授諸王宮病辭免以太子中

如皋縣志

卷十六

列傳一

二

舍改殿中丞致仕皇祐間驛召會秘閣議樂除大理評事兼太常主簿辭不就歲餘授光祿寺丞國子監直講仍與議樂樂成改大理寺丞賜緋魚嘉祐元年遷太子中允天章閣侍講仍治太學既而疾不能朝以太常博士致仕就其子節度推官志康養於杭州四年六月六日卒於官舍年六十有七瑗孤進獨立拒遠權貴義以自信時承用周樂其聲高不合中和瑗初得對崇政殿及會秘閣議按周禮以正鐘律用上黨黍列爲九等纍其中者爲尺尺定而律成於是撤前樂而新之用於郊廟又令作皇祐新樂圖記布之天下蓋積二十年而後成居恒患隋唐以來仕進尚文詞而遺經業苟趨祿利

及教授蘇湖嚴條約以身先之雖大暑必公服終日以見諸生立經義治事二齋倡明體適用之學慶歷中興太學下湖州取其法著爲令學徒數千爲文章皆傳經義必以理勝信其師說敦尚行實出其門者皆循循雅飭塗覲之雖不識知其爲瑗弟子也後爲太學四方歸之庠舍不能容旁拓步軍營廣之禮部所得士瑗弟子十常居四五五經異論弟子記其說爲胡氏口義侍邇經講不以諱忌爲避旣疾上數遣中使就問安否去之日諸生皆詣闕乞留公卿祖送都門甚盛初在丹州建議更陳法治兵器開廢地爲營田募土人爲兵給錢使自市勁馬漸以代東兵之不任戰者雖軍校番酋亭長

如臯縣志

卷十六

列傳一

三

廝役以事見輒訪備邊利害以佐大帥人翕然稱之瑗事材而行篤卒艱勤以沒詔賻其家諡文昭後世稱安定先生明嘉靖中從祀孔子廟庭

王觀字通叟惟熙兄惟清子也天姿英邁洽聞強記下筆累千百言不加點綴而華藻燦然至和嘉祐間與從弟覲從胡先生學於上庠聲稱藉甚高郵秦少游兩重之比試開封府相繼爲第一觀中嘉祐二年第授單州團練推官試秘書省校書郎遷大理寺丞知江都縣卒王覲字明叟惟熙長子也嘉祐四年第進士熙寧初爲編修三司令式刪定官不樂其職求潤州推官兩浙旱郡遣吏視苗傷吏承監司風旨不敢多除稅覲受檄覆案

嘆曰旱勢如是民食已絕尙可責以賦耶請盡除之後
薦除司農寺主簿轉爲丞韓絳出潁昌辟簽書判官坐
在潤公誤免起爲太僕丞徙太常哲宗立呂公著范純
仁薦覲可大用擢右正言遷左司諫極論蔡確章惇韓
績張操朋邪害正章數十上相繼斥去又劾竄呂惠卿
又疏將帥非其人者請易之茶鹽之害民者請革之青
苗之害乞盡罷之未幾拜侍御史進右諫議坐論尙書
右丞胡宗愈出知潤州加直龍圖閣知蘇州徙江淮發
運使入拜刑戶二部侍郎紹聖初以寶文閣直學士知
成都府兼兵馬鈐轄騎都尉封文水縣開國男食邑三
百戶成都地膏腴無閒田以葬覲索官地表爲墓田疏

如臯縣志

卷十六

列傳一

四

治城渠民德之號王公渠坐元祐間論事輕重徙河陽
貶少府監分司南京又貶鼎州團練副使徽宗登極還
故職遷御史中丞與柄臣不協遂改翰林院學士力請
外以龍圖閣學士知潤州徙海州罷主管太平觀遂安
置臨江軍覲清修簡澹喜愠不形持正論始終再罷譴
不少變卒年六十八紹興初追復龍圖閣學士
王俊乂字堯明覲從子也游學京師資用空乏或欲薦之
童貫拒不答林靈素設講席寶籙宮詔兩學選士問道
車駕將臨視推恩逮至講所去幃幄跬步內侍呼姓名
至再乂但望幃致敬不出旣罷皆爲之懼乂處之恬然
以太學上舍選奏名列下徽宗親程其文擢爲第一賜

及第望見容貌甚偉大悅顧侍臣曰此朕所親擢也眞所謂俊乂矣宜卽超用蔡京邀使來見曰一見我左右史可立得乂不往僅拜國子博士居二年乃得改太學博士鄆王謁先聖有司議諸生門迎乂曰此豈可施於人臣哉禮如見宰相足矣乃序立敦化堂下及王至猶辭不敢當進吏部員外郎遷右司員外爲蔡京王黼所惡以直秘閣知岳州卒年四十七乂與李祁友善首建正論於宣和間諸公卿稍知分別邪正兩人力也

查道字湛然其先歙之休寧人祖文徽南唐工部尙書父元方宋初擢殿中侍御史知泉州卒於官道奉母渡江居如臯性至孝母疾綿惓思鰕羹方冬不獲道泣禱於

如臯縣志

卷十六

列傳一

五

河鑿冰取之得鰕尺許以進母疾尋愈後母沒哀毀逾節杖而後起端拱初舉進士解褐爲館陶尉曹彬鎮徐州辟爲從事深被禮遇改興元觀察推官寇準薦其才授著作佐郎淳化中蜀寇叛命通判遂州至道二年有使兩川者以道治狀聞優詔加獎遷秘書丞徙知果州時寇黨何彥忠等依險自固穀弓露刃詔諭之未下咸請發兵殄之道曰彼以懼罪欲延命須臾耳遂微服單騎攜數卒直趨賊所賊驚悉持滿外嚮道神色自若踞胡床坐諭以詔意或識之曰郡守仁者也是寧害我則相率投兵請罪悉給券歸農驛奏璽書褒諭咸平四年代歸賜緋魚出知寧州會舉賢良方正李宗諤以道名

聞拜左正言直史館未幾出爲西京轉運副使六年召拜工部員外郎充度支副使賜金紫終龍圖閣待制道純厚長者以文行稱於時與從兄秘書少監陶尤極友愛自金陵破土族流離多貧困失職惟道兄弟盡力收卹聚食常數十百人得任子恩皆與族人以少長爲先後無親疏之間異姓亦分俸給之時其婚姻與人交情分切至廢棄者待之愈厚縉紳問高之卒年六十四丁傳字傳道孝子丁天錫長子初舉進士有司第其文爲一郡進士之首孝友篤信義恂恂似不能言急人之急惟恐後時擇士人之賢者延致門下使與子弟游故子弟亦多好學以禮法自律邑令敦請爲鄉校諸生師尤

如臯縣志

卷十六

列傳一

六

以道義經術爲己任邑之後進始知向學傳實倡之也元祐七年卒年四十八

明冒檜字友松洪武初起家明經耿介不阿以博學聞召對稱旨時值天下甫定田賦不均檜侃侃直陳無所顧忌上嘉納之授廣西監察御史揚郡同官者五人獨檜正色立朝有埋輪折檻之風

李素字叔文年二十七縣召爲吏素不肯就發憤習舉子業甫三載以書中永樂乙酉鄉試授訓導遷麻城教諭歷任凡十八年訓課弟子寬嚴有則去後猶多見思馬繼祖字崇功宏治庚戌進士初令博興寬仁敏決歲饑力請當道發粟賑貸民賴全活擢留臺御史持重勵風

節時二臺長交訂繼祖劾免之臺中肅然留臺一時有三馬御史人有德俊惡之謠而繼祖以德馬稱未幾忤逆瑾疏養病歸博興祀名宦臯人祀之鄉賢繼祖居家孝友持身簡重後進望之若嚴師多所成就昌叅議鸞其高弟子也子紳舉於鄉曾孫洛成進士皆以禮世家至今名其里曰驄馬里

冒鸞字廷和年十六舉於鄉第進士授兵部武庫主事歷員外郎郎中淮揚馬課故折徵時議徵馬鸞疏爭之得免有中璫出守留京倚逆瑾勢奏請船馬皆溢故額鸞裁其半陞福建左參議分守建寧平恕簡清一意與民休息有聶賢者債弁也橫索民間苛軍士鸞引文法繩

如臯縣志

卷十六

列傳一

七

之民有異母兄弟爭產訟久不決鸞諭以禮讓立解大茂山賊行掠遣人諭以禍福賊遂降旋以母老乞終養歸母卒以哀毀不起性澹薄夷雅口絕雌黃林居十有三年屏跡公府每危坐一室圖書左右不問戶以外事鄉里推重之歿祀鄉賢子諍臣以貢爲興業令剛直好風雅善隸書所交皆鉅公名士

馬紳字廷佩未冠游鄉校正德己卯舉於鄉六躋禮闈遂謁選授河南寶豐縣令邑大侵饑殍相望乃請當道發粟兼捐俸資多方賑濟全活者無算歲己亥上有事獻陵承檄營造行宮協濟鈞湘用綦浩繁調度有方民賴不擾在任四年知諸生陳策有孝行爲請旌表風俗爲

之返淳葺鬻序而士氣丕變革苛斂而民困用蘇與人無阿比苟同卒以不能逢迎上官乞休致晚年自號松澗是爲鄉賢御史述齋公之子人咸稱述齋公爲有子云

李潔字崇義素曾孫年十二補諸生宏治壬戌以例貢授瑞安簿有武弁多占軍屯懷金夜謁潔峻却之盡出所占一軍稱神明潔自職事外凡可佐令長爲政者不遺餘力人多嫉焉拂衣歸優游林泉日以農圃自適惟政有不便於民則力論之不讓也卒年七十有八子二鎮字國靖寧陽丞聞父疾卽棄官歸鉅字國容濱州吏目胡繼祖字敬修安定先生裔也正德間以貢知鉅野縣初

如臯縣志

卷十六

列傳一

八

任事民有持賄乞解弟罪者擿之去有坐妻死而蒙非辜者力釋之有撲殺大母抵上刑憲司欲曲貸其生繼祖以解組爭之卒得請生平無讐言孟行其姑母孀而無依迎養終身日與二三同志講明正學於安定祠無敢遏佚前徽卒年八十有二

錢藻字自文家貧力學成嘉靖己未進士授南禮部主事進郎中出守廣信時有汰卒八千途肆剽掠當事議啗以金藻第先聲厲兵以待卒無敢犯境者每折贖鍰多以粟置廩學社令貧士月得受粟數斗士咸戴之擢山東副使備兵霸州會永清朱家口數堙而數潰藻出舍虔禱中夜暴風雨漂一巨艦至遂因艦加堙堰成僉詫

爲神轉密雲兵備晉左叅政修築古北口諸塞蜿蜒七
百餘里累遷至湖廣左布政使以疾告歸垂一紀詔卽
家起用藻未上擢南太僕卿再遷光祿首請裁一切冗
費歲省不萬緡晉順天府尹藻方加意釐剔而宿疾
已作竟卒於官年六十有六詔予祭葬

蘇愚字君明嘉靖壬戌進士授南刑部主事歷員外郎郎
中出僉閩憲備兵興泉轉廣東左叅議進副使尋進右
參政俱備兵伸威除母服補參政貴州備兵都清擢長
閩臬旋長江藩移粵西爲左伯遂請假歸堅卧不出愚
饒膽智多戡定功於興泉礫曾一本於伸威蕩朱良寶
賴元爵藍一清於都清招徠苗坪天漂百五十六寨陽

如臯縣志

卷十六

列傳一

九

洞韋昌金十有一寨臻剖橫坡九股六洞十二營百八
十五寨旣歸卻軌杜門不通一貴人書萬歷初興化李
春芳以其邑苦潦欲分賦鄰境愚適入賀還昌言臯彫
劫狀而減所分者過半臯舊苦邊衣一役中產立盡愚
請於當路如旁縣例歲輸郡庫民到今受賜焉卒年七
十有八祀鄉賢祠

丁鵬字良舉號南溟年二十五始奮發讀書鍵關下帷三
年而業大就尋補諸生食餼嘉靖乙酉舉於鄉道經山
東濟寧州州大司馬楊浩見鵬長身偉幹美鬚髯與言
當世之務嶽嶽無少模稜奇之妻以女銓兗州別駕視
河事會兗豫決張秋沙灣又決滎陽東過開封歷睢陽

壞田廬百四十里河督盛應期大役丁夫五萬人鵬時分標開鑿自汴東南原出懷遠宿遷小浮橋溜溝等開濬以分下流之勢又濬汴西滎澤孫家渡等以殺上流之勢又修武城以南廢隄以防河之北流又於滕沛魚臺間開新河接留城沙口南北界兩河始安流無崩塞患歲省且萬計例歸主者鵬盡歸公家不私一錢主者銜之鵬艱不悅遂乞休時司馬浩且老鵬留濟寧終司馬之世偕其楊安人歸歸與曹相嚴怡冒士拔輩日以詩酒相往還年九十三終

沈躍國子生嘉靖間任德州判有盜晝騎而行劫賂捕者縱不問躍廉其狀責督捕者捕者不能匿竟責於法有

如臯縣志

卷十六

列傳一

十

太學生爲盜誣引躍力雪之兩臺交薦超擢行太僕寺主簿太僕卿故臯令黎堯勲也馬政悉委於躍當得羨千金分銖不私悉以簿正上黎嘆服晚歸江上環堵蕭然茆菽自甘足跡不至城市時天寒有估客被酒渡江遺囊金躍拊得之待其來驗實而歸之人服其德年至九十餘

宗傳字習夫家貧嗜學夏夜常納兩足甕中以辟蟻膚之患學成舉應天爲瞿文懿公所賞識七上公車不售乃就選得蜀之邛州一意撫循不忍椎剝以市上譽坐考功法當遷去之日猶出橐裝代貧民之逋賦者脫之桁楊邛人尤德之嘗客郡中鄰家有鬻女遠方者母子相

持夜哭傳聞而哀之旦起昇以金使得贖焉時嘆爲長者

殷暉字民望雙店人嘉靖間以貢爲四川行都司經歷興化有二卒遠役蜀中抵所理投檄當告返俱以道暍病暉察眉而語之曰若吾鄉人也道惡且遙毋遽往留之外舍令人調護之竟後先歿暉收識其行李自爲棺斂座之會直指使者至具陳其故請以回檄附御史郵筒致興化御史稱暉長者如其請蜀多虎患教民編竹籬銳其上至今賴焉歷九載不以孥從以老乞身歸挾二卒行李及遺金特訪兩家子於興化昇之兩家子視其父封識手迹宛然也

如臯縣志

卷十六

列傳一

十一

冒守愚字師顏富陽令鵬之曾孫也隆慶初選入成均累舉不售授官得高陽縣縣介瀛鄭間九河之滙時苦衝溺愚作隄與蠡接壤約蠡令共隄蠡令以蠡上游不欲隄沮於郡太守行視日囑其下令以詰旦休役愚謂郡勒朝停役而吾夕成隄不可乎乃躬行河勵卒一夜而築橫隄十里守詫異之隄成南抵蠡北達安州蜿蜒百餘里沿隄樹柳三萬株遂成沃壤今稱冒公隄愚爲政多所發摘以才調安肅安肅劇邑多豪貴中璫無得撓愚法者而貴人多側目矣移守德慶治德慶如治安肅民德之卒以安肅貴人修郟罷而高陽則生祠祀愚始愚在高陽識孫相國承宗兄弟於髫年課之衙齋與其

子曰乾同硯席愚歸而相國兄弟皆穎脫去人尤服其藻鑑云

郭師古字時用號中宇幼習舉子業家貧無書從人假讀一過終身不忘尤善奇門遁甲之書身偉長有力善馳射嘉靖末倭數內寇薄臯城師古爲當事謀畫輒奇中萬歷丙子舉鄉試丁丑成進士留戶曹主政出督臨清晉郎中時粵東土酋亂郡邑守令多書生不知兵本兵薦師古知廣州到郡卽圖方畧徧詢山川險要躬親戰陳由香山博羅沿至麗江俘斬數千人東粵悉平期年丁父憂歸起補鞏昌時西事日迫全陝震動師古憂之上安邊十五策朝廷躋之擢甘肅兵備鎮酒泉兼轄寧

如臯縣志

卷十六

列傳一

十一

夏平涼諸州事師古旣當邊事益奮忠勇教練整飭壁壘一新由是敵不敢窺邊晉陝左叅政乃在廷大臣方主欵貢不樂其成邊功忌之中以他事罷歸著有百將傳籌邊紀畧八陳圖說諸書行世子嗣興以成均上舍授福州府佐進鴻臚連舉鄉飲大賓卒年八十七

余志昌字翔雲少游泮長入北雍謁選授合州判官賦繁訟劇人習詐僞甫至任一以清肅自矢合輸粟例以私量課入公量納官餘歸主粟者而胥吏得售其奸志昌悉釐正之有訟民何滿負屈持金私餽毅然叱去卒爲平反緝盜獲趙松鞫贓得金珠無算志昌分毫無所取解組歸合人如失父母居林下以操行自勵爲一邑楷

模于文美字質甫邑庠生有學行順治初邑旱荒盡出私蓄佐邑令陳秉燹賑濟全活甚衆

余大美字仲容未弱冠列經生籍再試異等受餼遂魁一經王思任海內名卿也讀其闡中牘亟賞稱奇爰寓書定交性既孝友天篤又儻易不羣顧好奕嗜杯杓遨遊里社一以坦易宅心未嘗以疾言惡色加人生平多所撰述不自存稿僅得徐于齋詩文若干卷其從孫瓚猶記送惠然歸杭詩云爲惜六橋春欲盡還愁三徑草將蕪集中竟不載其散佚可知矣

劉灝字士曠生平多讀書又饒經濟才凡邑中利弊人所退避不敢言者灝侃侃言之無少忌萬歷丁酉科僅中

如臯縣志

卷十六

列傳一

十二

副榜人皆惜之後以貢初任商城訓導陞懷遠學教諭冒起宗字宗起號嵩少萬歷戊午舉人崇禎元年進士授行人五年考選授南考功司主事陞郎中七年出爲充西僉事監軍河上鼓勵將士賦不敢一騎潛渡久之聞父訃歸服闋備兵嶺西以卓異聞旋調湖南衡永叅議會張獻忠破襄陽再調襄陽監軍獨與左良玉收合餘燼歷一歲以城守招撫功被上賞量調寶慶卽拂衣歸竟以嶺西舊事坐降級十七年起副使督上江漕儲尋乞休卒著拙存堂詩文經質史拈擬陶集杜數十種皆爲世所重子襄褒別有傳

范志易字希宣以諸生入成均偕冒愈昌遊白下與吳國

倫屠隆輩相友善愈昌中讒去志易謁大司馬顧養謙
白其冤顧稱其誼略與申包胥同年五十謁選爲典客
未幾解組歸闕西園課二子廷瑞廷瓚其中瑞瓚隨補
諸生皆爲知名士瓚沉潛好學老而不倦年六十猶應
舉子試詩法錢劉無纖靡之習處友以誠宗黨以義倣
文正公制置義田以贍族之貧者父子皆有集行世瑞
別有傳

馬應禎進士洛之父也故事登科之家縣大夫於賓興外
常浮溢百餘金大都斂諸里甲禎以爲非禮一切謝卻
洛官重慶時奉禎教守官行已一意寬和雖蹭蹬仕路
恬然自安退居鄉曲人驟遇之不識爲貴人也少年後

如臯縣志

卷十六

列傳一

十四

進多折行輩與之游時稱長者

許邦雋字西白賦性溫厚與物無忤凡七入棘闈俱不售
萬歷末以增廣生入北雍爲成均上舍謁選授布政司
理問值逆璫用事時政日非遂拂衣歸尋卒妻陳氏故
明忠烈陳輔堯妹也孀居三十年栢舟自矢課子義方
有陶母風子納陞別有傳

吳一驥字伯顧夙負文名應諸生試輒第一常設教西河
一時從遊者數十人驥於四子畫別有會心矢口皆妙
義聞者解頤崇禎末年由選貢授麻陽縣令懸魚座鹿
比解組歸猶然一貧生時年七十五仍以講學爲糊口
計死之日一室罄懸門人營葬焉其清風高節可想見

矣

郜璉字方壺歷仕台州府經歷解綬歸舉鄉飲大賓性嗜山水五岳親歷其三雅善鼓琴時稱廣陵散復在人間尤精於繪事嘗寫芭蕉傳至日本海外珍之年八十三卒子瑞麟字昭伯文章聲氣籍籍有名

國朝范可裕字啟之號景衛文正十八世孫先世自吳徙臯代有聞人祖源攻苦早世祖母叢孺人苦節五十餘年爲女中嚴師父希曾官粵西丁叢孺人艱歸可裕萬里往迎於風江迅疾時轉行追值若有鬼神默接者明季里中疫死者相藉施棺貯靈威觀聽取之康熙庚戌年下河饑民乞食於居宅炊糜以食百人不數日而饑民

如臯縣志

卷十六

列傳一

十五

愈衆乃分食於諸子家至二千餘人啜粥之聲達於垣外行之數月不倦比至秋勸令歸農計口給錢以去捐建專祠祀文正公春秋俎豆自此始仿義莊遺制悉以所有田九百畝捐作義莊以夏麥給族之貧者而秋租則儲爲合族緩急之用勒石宗祠垂爲恒規晚創甘露菴朝夕梵誦其中以子端貴誥封奉政大夫屢膺鄉飲大賓壽臻八十有七五子十七孫曾元以下數十百人其善行詳載司徒梁清標行狀中

冒襄字辟疆明憲副起宗子以前壬午副舉特授司理官親老不仕後累膺徵辟卒皆辭免邑有樸踞城南濠就樸架亭與鸛鶴同棲遂自號巢民少遊董文敏門文敏

序其十四歲時詩方之王子安既長才益飈湧詞章及
行草書流傳海內家故饒亭館之勝好交遊四方賓至
如歸聯鑣方軌殆無虛日諸先達及前後館閣臺省下
逮方伎隱逸縑羽之倫來未嘗不留留未嘗輒去去亦
未嘗不復來生平大節挺然父起宗嘗犯權要忌抑陷
襄陽監軍爲必死地襄獨走京師泣血上書請命卒得
改調熹廟中六君子輩死璫禍懷宗反正被優錄已而
璫燄復熾修故郟欲甘心焉襄聯難蔭諸孤結社金陵
相抗躬蹈危險不顧晚年却掃家居年八十猶作擘窠
大書體勢益媚又三年卒其他事具見於名蹟藝文賑
卹各類中子嘉穗丹書別有傳

如臯縣志

卷十六

列傳一

十六

丁允齡字孩修少有才名善談論磊落不羣以文章受知
吳宏功王崱生兩縣今期許遠大屢以數額僅由明經
授來安訓導繼補涇縣陞宜興教諭所刻三縣修學錄
課士草皆有功聖門挂冠歸里以詩書教其子孫年八
十七卒

叢中蘊字含英六歲喪母哭甚哀至絕粒數日事父能委
曲承歡待異母弟六人尤極友愛產擇其礪僕引其老
器用取其朽敗有薛包遺意生而穎慧博聞強記爲文
下筆立就年十二游泮有聲丁西方弱冠領鄉薦臨軒
覆試中蘊以敏贍拔置前茅人爭榮之居家惟左右定
一省暇則手一編自娛及謁選得淮安府教授至任卽捐

貲修葺學宮日與諸生講道論文不倦遇貧士分俸給之以疾卒於官淮人士皆哭之子芳舒讀書太學不墮先業云

范廷瑞字公茂擅文名海內道符契合郵筒絡繹戶外履常滿而至性純篤庭除里閭無間言幼嘗受叢章海瀛章以諸生伶俜膳之終身不衰與彭際明友善際明博學多聞憐其死而爲之殯師友古道爲鄉俗先爲諸生十五年去之太學又數年聲華不減而試卒不售治笏圍一區肆志其間陳仲醇寓詩諷之曰曾聞小范能輕世不學王裴自埽除陳寒山亦云五湖自有家風在其奈元龍氣未除侍御凌駟簡命中州辟爲監紀通省兵

如臯縣志

卷十六

列傳一

十七

馬分理部郡疏云學通經術才擅劬勩大堪奮發懋猷佐平梟獍命下破產募死士以赴而凌殉節死於是益感憤自放長嘯終日逾年疽發仰而嘆曰得從凌先生於九泉復何憾遂暝董思白嘗語人曰范子翩翩卓然名品王季重陳古則曰廣陵宗方城後一人而已

石函玉字振響明鄉飲耆賓東疇之少子東疇有碩德孝友恭儉耄年舉鄉飲大賓舉八子教以義方俱讀書能文名列庠序時人有八士之稱惟函玉尤穎異讀書一目十數行十五入泮踰年食餼左國史漢諸子百家以及天文性理無不窮微盡奧與吳白耳余仲容相爲倚重試冠軍者三下帷攻苦積勞成疾年未四十而歿子

璜別有傳

朱鳳台字慎人靖邑鄉賢凝和之第三子也順治丁亥第
進士謁選得直隸阜平縣移浙江開化政績詳載治開
錄行取晉秩兵部主事請終養遂不復仕進自號退思
子庚子載書家如臯遵功令編籍安定鄉任土納賦與
士著無異生平佩服聖賢經傳捐貲修學宮東西兩坊
倡建育嬰堂置義田義塚三爲鄉飲大賓所刻有四書
解義退思軒諸書歿於靖邑崇祀鄉賢

吳世標字公建號嶰谷明天啟丁卯與許忠愍若魯冒徵
君辟疆同受知於學使陳公遂相友善癸酉忠愍魁南
國標已售復落癸未郡守開社廣陵拔標第一名翔江
如臯縣志

淮構別業積書數萬卷著述等身丁卯邑令董廷榮舉
鄉飲賓卒年八十有二子奎光雯彩霈膏孫棫芃文行
并重於鄉

吳師洛字道川性澹泊寡營不事紛華讀書外無他好幼
齡遊泮康熙壬子以春秋魁南國自登賢書後門無雜
客架有奇書教授生徒鄉黨咸服其高未幾卒人共惜
之

范永字孝標恩薦明經性至孝年十二失恃哀毀如成人
事父至白首日侍寢膳不離左右兄弟友愛邑中有義
舉力行不倦臯邑賦役舊有廂里長名色十年一役中
產立破永集士民白當事官收吏解積弊頓除創育嬰

社活嬰兒甚衆族有貧乏者婚喪取給焉流民入境必請於邑宰捐粟煮糜賑之邑中有疾病死亡窮困無告者立同善會施棺以斂之著有改亭日錄歿祀鄉賢以子大本貴贈徵仕郎中書科中書舍人

許嗣隆字山濤號文穆神彩疏秀九齡通五經學使者得其卷吟諷廻環遂補博士弟子員壬子選貢成均乙卯鄉薦時母黃安人清羸善病嗣隆憂之行不能正履壬戌魁春宮選庶常甲子獻南巡賦

上嘉賞之擢檢討充

廷試讀卷官編輯

內廷書籍文選諸書

如臯縣志

卷十六

列傳一

十九

特賜幣帛恩禮渥焉己巳聞母訃絕粒三口三年不與讌會癸酉補原職典試雲南所得士皆一時賢俊擢左春坊左中允兼翰林院編修晉侍講已邁疾憂親柩未厝力請告歸出都之日圖書數輻而已著孟晉堂集金臺集使滇記畧諸書

余瓚字文賓修髯便腹每棲身而學嘗曰烏有鳳魚有龍草有芝泉有醴斯皆嘉瑞出應昌期瓚幸處士倫畧識故事烏可使江臯文獻蕪穢不治因上書有司請排纂邑乘起萬歷戊午訖康熙癸亥六十有六年紀載賢士大夫德善功烈大旨畧備云

姜世寬字君裕父振所晚年病痺侍奉湯藥扶持起卧三

月不解帶已析箸諸昆或吐茹肥瘠裕怡然不與較惟請於宗老人曰祖宅傳且三百年未嘗易姓請畀予爲棲息地凡喪葬之費竭力經營不以諉諸昆康熙間大饑捐穀賑之邑令趙宏化以善蓋一鄉旌之子開緒字擴原號而膺年十五卽代父綜家政母鄒淑人暮年病瘵開緒晝夜撫摩每春日和煦背負淑人游藥欄花徑間得一味甘必懷之以奉耄年爲子孫曾元述先人笑語嗜好猶泣下不能止族有以事廢產者經營籌畫卒使得存鄉有憤爭者得一言立解其至誠足動人也以子穎新貴封直隸按察使贈父世寬亦如其官

范育字公和永之弟砥行立名惠和篤於鄉里歿後里人

如臯縣志

卷十六

列傳一

二十一

思之朱廷宁蔣世琦吳文昱沈頡數百人詣縣門稱育裊躬直諒立品眞醇孝事二親不懈存沒掩翼諸季弗替友恭居鄉則弭災拯患處世常利物濟人請祀於鄉以勵末俗已得請於

朝知縣周鼎鑑教諭顧溥訓導張鵬奉主人鄉賢祠二仲致祭焉

石巒字含銳工舉子業得嘉魚遺法兼習詩古文辭小楷出入鍾王臯中學者以巒爲稱首縣尹盧縉聘修縣志以明經終

許納陞字元錫清才迅發爲學林領袖臯志自呂公原削藁後六十餘年未續納陞同丁確石巒余瑣諸人訪羅

舊失排纂掇拾畧備一邑之掌故得藉重修大有功也
平生著述甚富子瑤邑諸生

范立字斯立豐軀偉幹聲如華鐘治生產綜理精密意又
豁如也兄弟五人出則同車入則共案先是伯兄端令
儀封署中凡百所需咄嗟卽辦仲兄永虛悻不寐常共
卧起手握其腕俾酣寢父可裕常憂本宗食指數千婚
嫁喪葬義莊菽麥不敷用立紹承父志捐田九百畝歲
入穀千四百石著規勒石鄉人空乏者寒子以襦饑子
以穀分甲乙籤終則又始歲費千金長子大成任汀州
同知擢瑞州知府公餘退食必以清白訓至鞠命盜獄
尤丁寧垂戒活一囚則喜形於色封奉政大夫晉階中

如臯縣志

卷十六

列傳一

二十一

憲大夫壽八十有八子孫羣從紆青紫者十九人
石與立字句餘讀書嗜古弱冠補博士弟子員己亥歲薦
以明經謁選得州司馬奉母終養不樂仕進嘗營葬祖
父母合羣從兄弟鳩千餘緡爲費旣葬潛以所鳩金返
之蓋恥已獨爲善故先諸弟又知諸弟艱於物力故獨
任之也族本繁庶有婚嫁無措及鰥寡無告者皆周之
晚年獨建宗祠春秋祭祀歲時伏臘祭畢族人燕饗相
與言孝言慈言敬一族咸化爲和睦邑中均差賑饑修
學立育嬰社葺文峯閣諸大興革皆賴一言而人悅服
尤先身任之不辭其天性好善趨義類如此子四爲基
候選訓導爲城候選州同爲墀候選學正以爲壘貴贈

奉直大夫澧州知州

胡邦棟字梁公三歲而孤七歲時母王病革以諸子屬家人而不及棟家人異之母泣曰若少年一如成人吾無慮也

國初棟年十五以寇盜尙有餘氛留意韜鈴騎射而於河漕屯田水利諸事無不講求已專攻舉子業以諸生應例入成均自知早衰不復爲世用築一室於城隅之龍游河終日默坐而已生平恬靜寡欲雖間治生產期於俯仰有資而止然好行其德與里人范永等聯同善會創育嬰堂收乳嬰兒歲數百計歲歉則散粟以周貧乏疫則施藥石寒則施絮衣死無以斂則畀之棺產不過中

如臯縣志

卷十六

列傳一

一一二一

人而傾橐不少懈卒之日無餘資焉以子香山貴贈文林郎翰林院庶吉士

石與德字克峻襟度灑然汪洋坦易人莫窺其際飲酒一石不醉爲文章自抒己見上下千載不隨人俯仰旣不遇卽放浪東南山水間興之所至窮日夜不倦子爲崧令雲中時隨大兵駐塞上與德從兩長鬚策馬徧覽諸阨塞亭障私有所論著多中機要爲諸生時嘗葺學宮與同人肄業修族譜置祠田與邑前輩冒巢民急友人之難論者踴之年六十有八卒以子爲崧貴贈戶部郎姜迓譽字子髦號碧滋姿儀豐偉家多藏書博通今古康熙初吳藩阻聲教慨然習騎射中壬子副車偕同邑冒

起蒙胡邦棟治學宮射圃率鄉茂材習射其間天性長厚喜怒不形於色課子極嚴延名師於家首頂夏楚踞而進之子任脩承義方之訓中康熙庚子京兆試明年成進士第三授庶常孫恭壽舉乾隆辛酉江南第五皆譽教也

許其晉字晝初號蕃錫幼失怙恃父母忌辰淚涔涔下孺慕之誠終身不衰康熙六年丁未割產三百餘金爲族祭田忠愍祠日久荒圯出己資葺而廓之族人德溥以赴義死藁座揚州之荒邱其晉資其後人扶櫬歸改葬焉倡建育嬰堂捐田以供乳哺費約聯事施糶賑饑名曰同善會官湖藩理問精勤幹達有吏屬對簿中丞檄

如臯縣志

卷十六

列傳一

一三二

其晉雜治之囚夜輸五百金乞哀其晉正色叱之却其金左驗無實卒爲平反辰州苗叛其晉奉檄單騎往諭之蠻人流涕受命邊釁以弭告休歸里二十餘年杜門絕干請邑令敬之舉鄉飲大賓

徐勅字而強夙負雅藻幼飲香名旣長與朱愼人鳳台金閻齋敞共遊處朱嘗稱其詩如絕壑丹霞煥然流炤激楚搖寒沁人心骨以明經貳隴州會王輔臣驛騷關陝突犯孤城知州翁世庸與僚屬皆陷賊中勅獨乘間馳數百里至定西大將軍營密陳機務大將軍表其忠義於

朝已恢復隴州勅以疾解官隴父老閻琳等泣請曰哀鴻滿野

流亡未復非使君無以活州民勅不得已留病益甚請告歸初勅父啟元病勅听夕禱於帝父愈遂改建玉皇閣告成之日梁間生靈芝一本鄉人瞻歎共指爲孝徵云以孫建杓貴贈資政大夫

沙鼎字元調邑諸生以貢入成均遊徐東海韓長洲門就京兆試落第入貲除建昌通判姜西溟贈之詩曰宏才非半刺雅韻足千春蓋深惜之也建昌僻處山陬民樸而事簡時具酒饌致諸生朋校經義詩古文詞近郡多名山若麻源華子岡諸勝時挾琴酒觴詠其間平生癖好點蒼山石比還輦數十篋從人咸疑之發之皆石也梅耦長曰君顛不減米老矣已督通省漕運往返萬餘

如臯縣志

卷十六

列傳一

二十四

里會歲除廉使劉廷機副使韓象起咸以詩酒推公獻歲各合樂張宴賦詩角射鼎忽疾六日而歿著有拂塵集盱江遺稿子六人長漢鯉綽有父風康熙乙酉丙戌間捐穀賑乏邑令周振菴稱其賢次漢鰲別有傳

丁其珍字天聘始在髫髻温粹而莊父間齋篤愛之曰是兒必亢吾宗十歲六經盡通未冠遊庠旋食餼間齋好士珍歲釀百餘斛治饌具丈人行咸嘖嘖稱孝謹善養云間齋疾珍不解衣兩逾月一七一酌必嘗而進之髮爲之白兩親沒哀毀骨立不御酒肉者三年將吉祭於城堙東南隅庀材飭土闢榛蕪而宮之環蒔花竹設主安靈曰不忍吾親一日未有所歸也又推間齋以上歷

世宗祊聚而祀焉授常州司訓未出仕而卒以子曾貴
贈承德郎

冒起宏字若水國學性孝友弟不事生產分食解衣贍其
乏至再四不倦倡建宗祠置祭田以敦宗睦族子與嘉
候選州同性誠謹言笑不苟好施子值歲稔賑費不貲
孫有萊有慶皆候選州判有筠國學有萊事孀母以孝
聞

冒起蒙字蒙求少孤母李教之成立領武鄉薦性至孝爲
安溪李相國所器重推守戎以親老辭斥貲建文廟宮
牆復學前射圃又創立宗祠修家乘置祭田心力兼勞
者二十年族人奉其良法屢舉賓筵不赴年八十五卒

如臯縣志

卷十六

列傳一

二十五

子與恒與學與時與恒爲邑諸生年九十餘生平無遺
行熟臯中掌故與學入成均與時授佐牧皆讀書通大
義以孝友世其家學孫詒補博士弟子員多著述

朱廷宁字式屏號惺園篤志闇修精研理學年十三補博
士弟子員康熙壬午捷北闈成進士時父鳳台年逾八
秩急圖養志南旋父卒釋服補中書轉戶部主事又念
生母師氏年已老遂解組歸友于兄弟克嗣前徽吉水
李督學以孝友可嘉族之他如敬宗收族任卹睦嫻撫
故交顏佳允之遺孤濟同鄉徐葉二生於顛厄迄今人
猶稱之雖判薇省遷農部綽有政績而孝養不遑究未
罄致澤之鴻略云子學潛候選司訓別有傳次之瀚光

祿典簿

朱廷宮字中治號省齋駕部鄉賢鳳台子五歲隨父遷臯
髻髻有成人度鳳台舊宅在驥江不時往來休沐其間
廷宮奉母師宜居臯晨昏溫清因心孝愛協禮式人
咸稱之十四舉茂才食餼上庠試輒冠軍辛酉歲薦入
京兆試以麟經額限一卷馳而復蹶枋文者多惋惜焉
益刻苦下帷日夕與兄廷宁相師友研讀時或達旦遂
病怯卒生平敦倫紀尚氣誼外和而內嚴遇事可否立
決未嘗一投足公府書史外無他嗜於城南葺惜字菴
拾片紙隻字焚之施漏澤園修橋梁施棺槨鄉里推爲
長者著有四書文西聲閣詩集

如臯縣志

卷十六

列傳一

二十六

胡香山字夢白號成村初生時父邦棟夢人抱子語曰此
白香山也因名焉十一歲舉秀才十三應省試卽膺薦
逾歲父病潛刲股以進歿毀瘠甚鄉人詣有司請旌學
使高裔曰髻年子衿至性純孝世所難也爲書其廬以
表焉年二十二遊太學日益有名尋以母疾馳歸讀書
家塾二十餘年四方名士至者如歸雍正癸卯成進士
授庶常充一統志纂修官綜覈今古體要大備擢編修
戊申改河南道監察御史協理浙江道事已復歸館職
總理內務府咸安宮學政先是

上重其選桐城張相國特薦香山

上諭曰張廷玉薦爾人品學問朕亦素知爾往造就人才不惟教

讀書也香山承

命更定條規闡明經學得觀保李質穎等二十餘人甲寅以疾謝職時方閣學苞總裁一統志纂本悉香山核正白鄂西林張桐城二相國致書徵之不出卒於家子申錫申穀申翼申穀與修一統志

姜穎新字文庸號至山十二歲受知吉水李公旋餼於庠

庚子以禮經魁南省癸卯成進士以練習掌故分纂大

清會典授編修丙午改補刑科給事中數月薦劾稱

旨丁未分巡天津河道明年調通永河道巡行經畫不費帑不擾

民時怡賢親王總理水利亟薦剡之擢直隸按察使矜

釋疑獄數十案捕奸猾劉金剛等數十人又獻縣紀田

如臯縣志

卷十六

列傳一

二十七

升雄於貲爲家奴所訟部以狀聞於

朝降

內勅使鞠之迺力陳本案狀無可坐罪請俟訪劾

賜奏摺有事得入告已赴獻審鞠援情按律稱

上意紀田升卒得保有家室念諸囚之待訊者夏曝冬僵狼籍堪

閔構屋宇俾偃息其中病則時醫藥死則備棺殮如是

者終任無間好培獎士類於署之西偏建觀善堂多築

齋舍爲諸生下帷地饘粥膏火悉出之清俸任河道時

兼攝鹺政課稅訪商民之利病而籌之少有贏餘悉輸

之少府壬子仲春將有江安藩伯之命以兩親皆八旬

乞歸養鄉里榮之

范元龍字雲生生而醇厚自束髮受書卽務求大指屬文華實並茂澤於經術其學以循理治氣爲主與復社諸君子往復辨析矢志復古不應學使者試隱居西溪卒年八十有三撰明鑑錄四卷西溪遺稿三卷子燕燾兼樵燾有傳

石麟祥字公發性淳樸能竭力事父母昆季二人怡怡雍雍無間言而制行嚴正遇事慷慨每建一議輒使人折服邑中建

皇亭修學校葺文峯閣諸事多爲鄉里倡率鄉人賴之早歲遊庠而不以能文章自命耄年猶嗜學不倦至今追述耆德者多欽仰云

如臯縣志

卷十六

列傳一

二十八

顧謙字天益白蒲人喜藏書蒲上文士知購度往籍自謙始母許忠愍女謙父士掄卒許矢志守貞後以哭忠愍死忠孝之教蓋有自也爲諸生六十年衣冠古樸閉戶繙經白髮抄書寒暑不輟手錄經史子集滿巨簏蠅頭細書楷法端正曾無脫畫惜身後散失殆盡矣

吳宗字萬時白蒲鎮人未冠補弟子員執親喪盡哀盡禮餽於庠而屢躓場屋兩兄早逝撫遺孤如己子其族世居於蒲約諸昆從營置寢室以妥先靈春秋肅祀事爲敦本收族計其子弟有能文章者約聚課於堂東西聯坐如號舍文成嚴定甲乙復留飲以勉之好爲詩著有研北詩存春坊嚴江宋丹林爲序而刊行之以子翀贈

文林郎武清縣知縣

蘇廷珍字席遴少時讀書聰穎魁梧奇偉甲子領武鄉薦越十年成進士以養母歸或勸之仕珍曰古人一日養不以三公易又何求乎朝夕承歡克盡子職前後縣尹以鄉飲聘不應卒於家子宏學

范大任字敬承生平多善舉經理本族義莊條畫井然族人稱其德焉先是臯有育嬰堂資用苦不敷大任益其數足於用又置田爲嬰兒塚

許大儒字董傳宮詹嗣隆仲子也甫冠遊泮隨父宦京師以附貢入成均教習旗學需次教諭生平慷慨重然諾端方孝友鄉里稱之好施與傾囊紓人於倉卒無幾微

如臯縣志

卷十六

列傳一

二十九

吝色以故家不中貲性恬淡遨遊名山大川時偕王方若查聲山杜茶村暨里中冒巢民石樊山諸名宿唱和著述極富刻有粵遊草二卷

繆偉望字賡期明旌二賢之裔遊庠屢困膺歲薦父松岩賑饑施藥建寺育嬰望與兄偉臣殫精繼善無憾弟偉業卧疾託治家事五載歿仍完繕歸孤曹令樞禮延賑饑獎曰廉操可風晚年構廬墓旁自適壽登八十子多出宰食餼孫皆文學著名著雪梅遺稿四卷

叢澐字雲起性敏悟未冠入膠庠屢躋棘闈以明經授望江縣教諭至任卽捐貲倡葺黌序校士一遵安定遺範貧不能學者賙恤曲成之上憲稔澐文行兩委攝縣篆

廉平人不敢干以私俸滿陞補知縣多士德之爲勒石以誌不忘緣親老不仕盡心甘旨謝絕人事二十餘年不以片刺謁長吏醇謹温厚與物無忤人共推爲碩德云

徐宏緒字克繩號含山父勅官隴州宏緒侍祖家居夕膳晨饘得祖懽而寬父懷暇輒攻苦讀書甫冠爲博士弟子員已父祖相繼逝哀毀骨立杖而後起先是母劉早卒宏緒在襁褓中不及見及長思慕不置營墓啟窆一痛欲絕人咸以孝稱之以明經爲當塗學博摩厲士習刊天門課士錄以爲式擢安仁令禁民間鬻妻溺女犯輒置之法而又多出銀粟以安全之邑有蕭公隄日久

如臯縣志

卷十六

列傳一

三十

嚙蝕宏緒節縮俸入復治故道一如昔籠石堤水法會山水暴漲穿堞亟鳴鉦招民登署內山以避之活千餘人卽躬詣村落庠死慰傷先發粟賑卹然後繪圖以請民咸感泣於蕭公祠左建徐公祠祀焉令安仁六載撫字緩徵勸農平糶如漢循吏大吏交章薦會得遷因積勞沉疴力請歸去之日民間攜妻負女泣曰皆徐公賜也歸里偕弟宏成奉繼母沈以孝聞先是父勅遺命創鬱羅閣繪椽藻櫺若遊清都解組後嘯咏其中蕭然有出塵之想卒於家以子建杓貴贈資政大夫

張槎字漢乘號秋溟清貧有操嗜古力學幼失恃奉祖母吳鄉居以孝謹稱甫食餼侍父祔於朝城登闕里陟泰

岱纂述摹抄積而成帙已教習成均一時鉅卿莫不器重引進之丁父憂扶櫬南歸時大疫同路死者相枕籍率焚尸河干槎長髮鬻面辛苦萬狀六閱月得抵里無所侵焉服闋出遊自燕歷豫浮江漢泛洞庭躋祝融昔賢遺蹟必手摩口紀雖停車待渡僕御催促弗恤也除亳州學正以老不就年八十卒

范大英字咸音號岷山邑增生誥封奉政大夫立第四子也侍母任孺人疾刲股以進母歿嘔血數升母既葬苦塊飢粥廬墓側三年及父沒亦如之遂屏迹不入城市後學博顧溥過其故地愴然流涕爲題曰范子廬墓處范燾字時巖祖廷瑞十歲隨父居溪上溪距城二十里日

如臯縣志

卷十六

列傳一

三十一

入城就外傅力學讀書常竟夜不輟倦欲睡以頭觸柱年二十學成三十始一應提學試輒第一歲科試又屢冠軍餼於庠四方從遊者甚夥讀書舊時別業敝廬數十椽荒徑數百武晝無人聲夜聞鬼哭雖饑寒迫切所弗恤也自吟有三旬曾九食之句其苦志如此事親務先意承志家雖貧未嘗絕甘旨父嗜木嗜食豬肺父歿遂終身不忍食肺居平以館穀自給有餘則以與兄弟之貧者以節儉故晚復先人產數百畝喜閉戶著書然成卽自焚其稿惟講天人性命之旨及說太極西銘諸解門人錄而藏之名曰慎餘編年七十二以次應貢病卒子承宣登壬戌進士

李四載字奠九篤行嗜學與白蒲姜退耕同受業於撫軍張清恪公讀書滄浪亭聲振省會戊子辛卯兩薦不售名輩多憇憇北游因母老不忍就道母促之再以泰州監中京兆試旋歸終養庚戌上公車卒於京著有餘閒堂詩古文集子筠臯明經增灼臯庠生

范大本字心淵號缺菴以諸生食餼貢入成均官中書科中書毘陵徐公子避難相投爲之謀饗殮安室家俾處異地如故土邑中均差一法倡自大本父改亭本承父志每邑令下車詳陳利弊懇其母惑浮言堅行良法比戶盡受其賜崇川陳某偕行之京適逢恩例貸金授職及任廣西巡檢客死櫬歸大本深爲憐憫絕不責償舊

如臯縣志

卷十六

列傳一

三十一

令趙丁艱缺課首倡捐助得疾垂危又代備後事守汛婁溽暑驟亡買棺速斂妻子自秦千里來謝臨別厚遺之其重義輕財生死勿渝如此居官三載以母老乞歸咸祖餞都外賦詩以贈有極知無計留君住更有何人似此回之句蓋紀實云

孫乾字惕菴幼失怙奉母至孝以諸生入成均需次司訓因母老不仕性甘澹泊好學不倦割書室爲斗姥宮爲母祈壽日與張孺子范栗園趙左廉諸耆舊習靜其中咏酬不輟士林企慕焉

黃絜字矩平邑諸生少有文名慷慨好義嘗斥腴產以贍其族又置義田座朽骨施榼殮遺骸鄉里義之謂有文

正遣風焉雍正三年通州改直隸初創試院院東阻河水入試士多不便絜捐金建利水橋過者便焉又捐社倉積穀三百石晚年益樂善不倦母年九十九歲白頭膝下無異孺子年登九十

賜粟帛二次給八品服以榮之

冒兆禧字介菴六歲失怙哀毀幾絕母孀居好靜爲築不波齋以養志侍奉無懈容平生尙節義崇禮讓嘗延吳文昱於家教授諸子歷三十年久而敬之中子廷駒喜讀書杜門習靜教子弟躬行之學廷駟謹言行慎交與截取州判以事親不赴季子廷騏有至性以哭父卒石爲茝字五遠以諸生貢成均屢困棘闈鬱鬱不得志束

如臯縣志

卷十六

列傳一

三十二

裝出遊足跡所至山川雲物形諸歌詠猶以未及遍遊五嶽爲憾兄爲崧詩有有弟同余癖常懷五嶽遊之句晚年閉戶吟嘯時拈丹青有宋元人遺意高堂色養兄弟友愛出自性成卒之日早起謂家人曰速治具吾將逝矣一笑而終

石爲崑字五瀛少與仲兄爲茝同遊鄉校屢躋省試循例入成均伯兄爲崧官靈邱隨禁旅征噶爾旦効力軍前督運糧芻動合程度論功議叙州判卽用丁內艱歸服除念父老不樂仕進潔白之養克躬盡之性耽尊彝圖史甄別眞贗有米顛風友于之愛白首尤篤推宅與兄移居河西駕畧約通之里人名爲雁橋

陳謙字自牧舉戊子武鄉薦博學工詩文與高贊兩深范
越山捷友善嘗寫梅題贈越山云春夢婆呼蘇老大清
宵人遇阮狂徒一時傳誦姪某貧從孫某瞽皆割田贍
之老友張茗柯年八十餘使諸子迎養於家茗柯卒爲
梓其詩以傳焉

冒勗字予懋垂髫有識度父寰瑋曰此兒駒齒未生已隱
龍文十餘歲三試皆冠其曹補博士弟子員方試海陵
過登仙橋聞父訃痛哭墜橋下叔父老勗迎養之常念
族姓蕃衍宗法未明遂偕族之同志創宗祠置祀田修
譜牒迄今烝嘗勿替海陵蔡孕琦勗友也以仇家誣搆
陷大辟女蕙上書訟父寃勗傾產飲助之

如臯縣志

卷十六

列傳一

三十四

聖祖南巡蕙涉水上書孕琦竟得釋人皆歎女之孝而稱勗之義
焉卒年八十有五子天錫登丁酉武鄉薦孫國柱恩貢
生

沙潛龍字躍其號吟菴父鍾璘積善裕後鄉里稱古君子
潛龍克廣先猷家聲丕振生平輕貨財重然諾慷慨好
施予交結當代名賢門多長者車轍邑有興革縣大夫
虛懷咨詢多所擘畫雍正十年倡修學宮鳩工庀材不
遺餘力士林顓請於學使張宗伯廷璐爲撰文紀績勒
石學中且表其廬曰義重鄉閭子旣仕潛龍益謙退築
別墅於南郊以樂餘年州牧胡廷琦贈以端方孝友縣
尹彭履仁贈以砥礪廉隅僉以爲非虛譽云

鄭臨字遠度幼受業海陵唐石郊又負笈就白門讀書好學遂占籍舉秀才試有司必茂等選行精嚴錄學者比於艾評與筆硯之伍相切劘爲制藝旁及詩古文詞靡不造微惜弗得一當以少展其畧籍鑾儀參軍需次家居閉戶繙經彌敦夙好日邀近局歛密流連茗椀酒鐺磨韻射覆往往達曙著述尺餘手自吟削分體八卷藏於家

沈宗昉字西山幼入膠庠試輒冠軍食餼二十餘年與里中胡夢白姜退耕文名相埒晚年絕意進取同胡夢白議創崇正書院隸洲田五百餘畝以充膏火已恐田入不足復自割百畝益之著有綠天書屋詩集松園文集

如臯縣志

卷十六

列傳一

三十五

子全道全遜全達全遇以子全道貴贈儒林郎

顧遠字雲聲白蒲人孝友嚴重無遽言忤色家庭間雍雍如也生子九人皆克樹立以子之瑞官鹽曹贈批驗使蘇宏學字景瞻入北雍需次州牧端慤周慎無故不離親左右從弟敏學幼孤甫授室而逝兩世孀居煢煢在疚宏學周其緩急歷數十年如一日天性恬適自奉儉約遇邑中興建大事又未嘗有吝色重修其六世從祖方伯襟海塋墓里人咸義之晚年絕意仕進杜門不出邑令劉煥曰吾一見蘇君卽知爲長者

石景羲字右軍幼失恃哀毀類成人長事父巢雲先意承志無違朝夕事後母余以孝聞乙巳羲倡建崇正書院

勸同人公捐田七百餘畝延師較課集闔邑英才陶淑其中甲寅歲饑邑馮今議賑義偕其弟立暨諸士夫勸捐州牧胡公雅重其行以郊祁齊步旌之辛亥修葺學宮復竭力捐貲並董其事生平勇於爲善類如此惜未竟其志以諸生終子鐸鎮廷錫皆有聲膠序

宗芳山字厚菴少藉父祖業饒於資戚屬咸取給焉芳山畧無吝色或以不滿欲訾之弗校也而家以落鬻餘產入貲爲兵部司務貧困不能給饗殮遇里人遊長安者猶必質衣沽酒款洽備至云

胡申錫字謙承翰編香山子也少攻舉子業旁通詩古文辭從父宦京師一時巨公皆引以爲友極器重之執父

如臯縣志

卷十六

列傳一

三十六

喪哀毀骨立以奉父命往崇川未得視含飯爲恨學博丁宏遠欲舉申錫應孝廉方正科不就家多賜書又喜購佳刻牙籤錦軸古香襲人手自丹黃寒暑不輟取二十一史考証辨駁指其錯誤多開古人所未見中年閉戶焚香靜坐恬如也子之本之森之喬皆以文學名李達字爾上舉康熙乙卯武鄉試胸儲韜畧植品端嚴以親老不仕勸學課耕躬行仁讓足跡不履公庭兩舉鄉飲不就卒年九十有一子岐邑諸生夙嫻掌故年登耄耄

姜任修字退畊舊名畊號自芸博學於天文地理禮樂兵刑及詩古文詞無不通貫書畫亦詣絕品爲諸生時儀

封張清恪公巡撫江南見其文奇之羅致幕下講關洛
濂閩之學康熙庚子舉京兆辛丑捷南宮授庶常雍正
癸卯改授清苑縣令日理訟牘百餘事聽斷敏捷以誣
劾罷職縣民依戀送數百里外歸田後一榻蕭然吟咏
弗輟著有讀易輒書五卷讀詩小箋五卷楚詞繹十卷
漢魏六朝詩繹四十卷白蒲子古文十卷編年詩三十
六卷卒年七十有六

鄭大德字衣聞號改之一號獨石康熙丁酉科舉人辛丑
進士選浙江山陰令未幾以母憂去雍正九年赴補值
憲皇帝廣求民瘼知縣得條奏地方事件大德卽條奏山陰縣徵
糧造冊及原籍江南如臯縣私派飛差二款奉

如臯縣志

卷十六

列傳一

三十七

旨鄭大德原摺交與李衛時大德掣籤山東齊河縣

憲皇帝察其能仍改發浙省交制軍李以大縣用補知鄞縣事制
軍時正釐清浙省錢糧冊籍其如臯一款密行江蘇藩
司查辦大德又細陳臯邑自康熙三十七年以前凡有
差役里長派之各戶輪充名曰硬擡是年禁革硬擡例
計畝捐派經承催收名曰軟擡公事雖歸公辦銀兩出
自民捐每年視事務多寡爲輕重無定數制軍檄取臯
邑歷年簿籍果然奏請免追既往嚴禁將來於江省設
法存留公項備用以甦民困由是諸弊永革不獨如臯
山陰二邑江浙各州縣莫不隱被其澤治鄞三年以疾
歸里閉戶著書嘯歌自得所著有章貢樓易說咏月閣

文集九悔齋詩草

朱龍鼎字伯鉉號復菴別號桑田名諸生干支與宋李嵩明徐渭同自爲詩曰生成自信爲徐渭變現人言是李嵩十八歲時父生員道美以訟事坐誣艱難匡救事得白旋以族亡命匿婢事發刃中其耳竟不死後族人奪其宅辱其父致訟數年寃抑不伸縲絏囹圄屢瀕於危久乃昭雪又仇家父子殺人以鄰佑被牽者數年何多難也其間渡大江過燕子磯歷惠山虎阜瓜步金焦北之鄒之魯之齊皆避仇匿跡非登山臨流得意尋勝者比也迨仇貫盈自斃歸卧舊廬田園蕪奴僕逃荒涼蕭索概置不問惟日握筆爲詩文自寫其胸中壘塊鬱怒

如臯縣志

卷十六

列傳一

三十八

蓬勃豪宕有奇氣晚年孫曾繞膝子二曰虛曰果九十
一歲卒著詩古文辭甚富族譜年譜各二冊爲魚嗜錄
八卷註杜律曰翼顧沉埋已久其曾孫大剛訪得之
徐建杓字文度號甸巖蚤失怙恃性肫篤與從弟瞻雲最
友愛朝夕依依有所往必偕雍正甲辰選湖南常德府
通判引對

圓明園敷奏剴切

天語褒嘉連稱好好遂

恩予記名其在官也賑水災擒劇盜慈惠嚴明仁至義盡大吏重
其才檄督京餉以除夜雨雪役夫遺鞘鐫級歸改園爲
祠置田贍族歲暮復給銀米其敦本如此修葺學宮建

立書院助膏火以培土擴地基以育嬰設藥局施棺槨捐義塚治道路造橋梁不一而足其好義如此爲人足智多勇力變起倉猝措置裕如嘗送弟瞻雲赴省試同二三友人寓秦淮水閣一夕鄰寓火起已及門俯視閣下有舟急雇之舟人故昂其直欲解纜去杓怒躍下舟一足挽柱一手按其頸抽佩刀曰不載卽斫爾舟人惶恐亟載之是時火已入室瞻雲及同舍生縋而下乃免於難而身外物盡付一炬矣遂解腕上金條脫質焉爲製衣衾並助友生入場費白下聞其事者爭欲識其人素通技擊又工揮彈曾泊舟太湖遇盜命開窗然燭獨立船頭曰若輩欲劫吾財當試吾技岸上廟門有環吾

如臯縣志

卷十六

列傳一

三十九

丸三發一在環外任所取盜方猶豫不轉瞬間弓響環已納三丸盜於是驚愕奔散生平好讀書流覽史冊工詩古文辭每朋輩謹會雅歌投壺意致瀟灑晚年以助直賑復原官助餉候選知府捐授資政大夫七十有八歲卒子二長觀光官刑部山東清吏司員外郎次觀政官兩浙寧紹鹽運副使宦績義行皆承其父風云石立字雙峯號梅園性孝友先意承志得父母歡兄弟怡怡少卽慷慨負大志見義無不勇爲四方知名士偶至於斯皆握手權如平生詩酒談笑灑如也慷慨好義葺學宮建書院義學脩邑乘皆爭先恐後捐地租四十餘金圩田五百餘畝備膏火助幼學出資育嬰發粟救饑

孳孳焉如其尤大者請除坍糧堵牙橋皆挺身對簿幾經挫折堅持其議不可回卒得允行而民困以甦大害以除救億萬人性命貽千百年利賴在於此矣雍正中

詔舉賢良方正邑令學博以立薦時督學政張葯齋賓禮褒嘉辭以疾不就年七十有七卒子鉉任西充縣令銳貢生鎬候選州同知鉅鄧州吏目好善樂施均如其父云石爲壩號宣六器宇軒昂胸襟磊落讀書志在經濟常慷慨留心當世之務授湖南澧州知州州人赴歲科試必由洞庭風波險阻道里殷遙不但資斧困竭且惴惴焉恐禍生不測詳請於州城建試院自出貲七千餘金澧

如皋縣志

卷十六

列傳一

四十

人士踴躍鼓舞文風大振蘭水無渡行人苦之設義渡以濟滅頂濡首永無患焉奉檄率五十六州縣開墾荒田饑不暇食勞不暇息竣事列上考後因脩堤忤長官意解組歸百姓攀轅遮道送者數千人治績載州志名宦家居三十年急公好義若脩邑乘葺學宮建書院皆首白邑令倡率邑人次第舉行無倦也

朱濂字景溪號湘亭舉茂才需次翰林院待詔以子昂封儒林郎濂五歲失怙六歲失恃哀毀如成人事祖母左右就養無方遇父母忌日執爵灌奠輒伏地嗚咽不能起友愛諸兄怡怡如也性輕財重義爲善惟恐不及葺學宮立書院脩邑乘增樂器建惜字菴慨然輸貲且早

夜經營務殫心力葺其事親友有困乏者未及告匱往往先爲飲助其祖駕部於岔凌河施漏澤園年久叢葬旣滿復捐田擴之以廣先人遺澤生平於世俗所好曾不爲動惟沉酣典籍手輯儒先語錄勵行誼訓來茲子昂楸昇俱別在傳

張學舉字乾夫號南坪年幼工詩精帖括雍正乙卯舉人挑選福建鹽大使稱職有餘地任縣令丁母憂去官服闋發粵省補番禺令地處海濱豪民爭沙積案甚夥學舉請於上官乞假親勘不期月舊案悉清民情悅服值歲饑條議開倉平糶設廠數日而市價日昂蓋市儈居奇密令奸民僞爲販布者插尺於布尺露一寸則米長

如臯縣志

卷十六

列傳一

四十一

一錢二三寸以上亦如之日凡兩次行街市各舖戶視以爲準米價騰貴一日之中遠近相應學舉廉得其情擇其尤者重懲之米價大減番禺民賴以全活以此大吏交薦歷州牧郡守擢觀察正己率屬皆有惠政公餘借筆墨自娛樂作詩古文甚富年七十卒於官著有南坪詩抄行世側室夏氏事姑孝姑劉病癘不能食夏每晨供乳病賴以痊鄉黨稱之性好施與善事難一二數朱之瀚字有鯤號補堂兵部鳳台孫戶部廷宁子也倣儻有奇氣頗懷經世才少從父宦京師治舉子業兼工韻語落筆驚人爲海內宗工所嘆賞才大而艱於遇試輒不售遂援例授光祿寺典簿亦不樂仕進居家養親朝

夕承色笑以孝稱建宗祠修譜系扶孤寒拯困厄止訟
獄解紛爭宗族鄉黨親戚友朋被德者多矣修葺學宮
建置書院文教以興助堵牙橋請免坍糧大害以革施
棺收骸捐田備葬其仁心爲質而見義必爲也如此
徐建中字瞻雲孝子洪成子當洪成死於孝建中甫七齡
卽心誌其事及長懼父孝行或湮匍匐求大吏奏
聞得蒙

聖恩旌表是時多羅慎郡王賜額曾閔遺風謂能以孝世其家者
建中大父舊築玉皇閣後遭回祿建中斥產與兄建杓
鼎新之更擴其規成先志也生平植品端潔曾辟孝廉
方正不就性嗜學枕藉經史深窺奧妙制義一遵先正

如臯縣志

卷十六

列傳一

四十二

矩矱七赴棘闈得而復失者再四舉優行督學鄧艾堂
贈以詩有望重鄉閭學探精蘊之句人謂無愧
鄭大任字蹈之號懷二其父爲讎陷禍且不測踉蹌走數
千里抵京事得白人稱爲孝以州司馬爲粵東庫大使
四川仙林場鹽課大使遷西充縣令爲政嚴明吏民不
敢訛法有治聲以母老歸養絕意仕進購野圃名東園
疊石濬池蒔花種竹與二三老友觴詠其間暇則緩步
隴上有所得輒爲詩如是者廿餘年年七十有七卒
鄭大綸字言思號掌之幼失恃事父以孝聞讀書求實用
以濟世利物爲心授隴州牧州地高土瘠常苦旱歲比
不登相地宜濬渠瀦水教以桔槔庠水法民資灌溉無

歉歲設書院置學田造就人材士皆蒸蒸日上隴俗素强悍多藐法化以禮示以威奸民斂跡辛酉大饑甘地民就食於隴發倉粟計口授糧全活數千人大吏曰鄭隴州真不愧民牧也汧河素橫木爲橋夏秋水暴漲橋卽衝壞又沙底不可易以石爲設舟四渡行旅人呼爲鄭公渡以葬親乞假歸遂不仕所居蒲上舊南北石橋各一南橋圯捐貲修之其他周貧苦親友施衣藥棺槨殊難枚舉卒年六十有五子景莊景誠景綱景畋

范瑄字蒲南號舫齋以州判効力南河承辦隄工備埽料督夫役幹練精敏隄成速且堅辦宿遷賑給銀發粟民沾實惠劉莊場病涉捐貲建石橋往來行人稱便以疾

如皋縣志

卷十六

列傳一

四十二

歸卒於家生平負幹濟才有大志人謂未竟其用性敦篤孝友睦婣任卹六行皆備焉

朱見乾字天五號曉嵐由雍正乙卯舉人選四川三台縣令時鄰境西充縣有劇盜劉斌聚衆劫掠積年搜捕不能得乾泣任甫三月遣幹役偵其出入親率兵丁民壯擒渠魁於鳳皇山下並取餘黨究治之非種旣鋤去善良以安捐俸修學宮以振興文教爲己任充庚寅同考官所薦拔皆雋士後以年老力衰懇辭煩劇改授徐州府邳川學正亦可謂知止不殆者矣壽九十二子僑監生兆仲庠生孫鳴鶴邑文學

顧雲字伯固號北墅由乾隆甲子舉人補內閣中書珥筆

樞要動中機宜歷官吏部文選司員外郎矢公矢慎永
絕苞苴尚躋卿貳列台輔經猷未可量也未幾抱疴歸
里適性陶情構水西別墅偃仰其間種竹蒔花疎落有
致當春秋佳日偕二三知己把酒論文臨流賦詩興到
畫墨菊三兩枝頗高逸入神或與親戚情話或與田父
野老課雨問晴意度瀟灑有飄飄出塵想見者疑其爲
神仙中人不知其爲富貴中人也

戴知誠字斌章號蘧菴貢生初筮仕山東堂邑縣值水災
民饑旦暮且死捐俸銀二千餘兩救饑民全活無算知
臨清州事改建州城督工不遺餘力城甚完固爲安慶
太守政繁劇晝夜勤勞稱厥職陞陝西鹽道未抵任卒

如臯縣志

卷十六

列傳一

四十四

知誠孝友根於天性幼失怙事母氏商曲得歡心與弟
知相怡怡然終身如一日知相官陝西葭州吏目

汪之珩字楚白號璞莊幼聰慧嗜學長益篤博覽經傳爲
文恪守先正不踰繩尺尤工詩時與海內英流壁箋分
韻興酣落筆揮灑淋漓其見於甲戌春吟文園六子詩
中者錢梓蔭蔣星岩輩頗珍賞徵輯邑人詩稿爲東臯
詩存四十八卷上下數百年網羅放失推闡幽隱意良
深也生平慷慨好義修明倫堂雨香菴建水明樓置義
塚探囊輸貲無吝色亦無德色乾隆丙子歲大饑出粟
救饑民全活無算餓斃者施棺殮之他若推食解衣不
可殫述誠孳孳爲善者矣子爲霖任廣西觀察

石孚字信也號省齋爲諸生蜚聲庠序肄業太學應順天鄉試不售孝友性成其父沒未葬諸兄相繼逝值家中落卜地諏吉治父兄喪皆盡禮新宗祠修族譜置祭田經畫得宜邑中葺學宮建書院不惜重貲襄事朋輩相齟齬輒推心置腹一言解紛人稱長厚卒年八十有一

沈全達字虞聰號朴村由知縣至知府宦遊二十餘年桐廬安仁台州金華等處所至皆政績卓卓有古循良風四十始仕少年才識過人理家政井井有條鄉黨遇疑難事談言微中可以解紛而循循謙退絕無矜容其高誼如此

如皋縣志

卷十六

列傳一

四十五

吳際盛字遽仕少孤事孀母撫弱弟以孝友稱由甲子副榜仕滇南初攝和曲州轄三土司最獷悍那酋尤狡獪餽千金嘗試峻拒之自此人知爲清白吏折獄明敏多所平反大吏重其才委兼路南江州兩篆調文山有惠政暇日引諸生剖晰經義論文章法度人皆鼓舞歡欣爭自濯磨底於有成解組歸里依然嘯歌遽廬著書自樂何其高也

鄭景誠字軼虞號默齋天資卓犖學貫古今隨父大綸隴州任十年嫻吏治以例授工部虞衡司郎中初入官卽向大司空條陳四事才識見重於時督理五城街道鋪戶呈請設立坊牌飭吏錄允駁批示榜通衢不得營私

延擱坊市稱便監督寶源錢局不受運官私謁直將銅
勛詣局交收永絕苞苴心清似水監木廠出貲雇工
木清查註冊補其缺監堂印有堂稿未全署押強誠用
印者誠持正不可在部公明勤慎堂官奏薦將大用以
丁艱歸病耳重聽遂不仕家居二十餘載樂善不倦戒
子姪輩讀書惟希聖希賢爲官在有猷有守好流覽史
冊文有關於世道人心者往往手自點定編輯十數種
存于家卒年六十有五子鸞邑庠生鴻分發浙江試用
縣丞爰邑庠生以實布政司經歷

徐觀政字憲南號湘浦少倣儻有奇氣好讀書耻爲章句
儒父建杓知其才爲援例由中書授浙江鹽運副使歷

如臯縣志

卷十六

列傳一

四十六

署湖州府烏鎮同知台州府通判等缺俱有循績聲上
游器之暇日偕浙水諸名流觴詠湖上竟日畱連人目
爲蘇白後身旣以親老引疾歸奉晨昏於水竹居問視
維謹依依孺慕徐氏以好義世其家至建杓尤勇於爲
善政則先意承志葺學宮及書院捐田爲諸生膏火貲
賑饑黎施義塚疾者藥之死者櫛之橋梁寺觀傾圯者
修之諸義舉所費不貲皆竭力仗助冀當厥考意蓋爲
善也而養志寓焉父疾嘗藥以進衣不解帶者兼旬顛
天乞以身代及居喪哀毀不欲生母泣諭三日乃啜粥
時時飲泣喪母氏亦如之服闋後仍赴浙補原缺整理
鹺務剔釐積弊商民使之委解回匪眷口復委解閩泉

軍餉皆籌備周至措施裕如中丞嘉其勤敏故繁劇多藉手政政亦罔弗得當以報也顧以頻年奔走舊疾時舉力請大吏爲退休計大吏畱之不得遂解組歸息影霽峰園與邑名流爲文酒之會疾少舒自顧精力就衰無復出山志念邑中諸事修舉唯邑乘數十年未修恐多湮沒乃倡議增續請於邑令力主其事偕二三同志搜遺蹟採舊聞幽隱未彰者表揚之延名宿數輩屬稿露香草堂中商確矜慎爲傳信之書勞心勞力政之功居多閱五載書成付梓乃竟以劇疾死遠近惜之生平嗜吟咏所爲詩豪放無詹詹言書工顛草多古致畫竹在湖州息齋間所著有湘浦詩稿若干卷藏於家卒年

如臯縣志

卷十六

列傳一

四十七

六十有六

朱大剛字岑灣號伸萬幼穎異工楷法弱冠試輒冠軍議論每驚四筵家貧謀菽水養西秦一游卽古孝子陟屺岵之心嘗作望華圖以見志後以增貢入成均昌黎所謂深林變化真魁傑人也時甘涼觀察王芍坡涼州守吳拙菴尊禮師事聘主天梯肇興書院臯比談經從遊皆爲名儒致身通顯後復廣其傳於浙紹荆楚而岑灣自此老矣晚歸里闈晚翠軒猶獎勵後進不倦歲辛酉間偕邑紳徐湘浦等董修邑志忠孝節義之大採訪無遺至修明倫堂葺尊經閣及關帝廟濬城河捐賑等事又其緒餘也年八十六以壽終有岑灣遺稿藏於家

儒林

宋胡瑗字翼之謚文昭世稱安定先生白河汾以後能立師道成人才者以安定爲首稱明嘉靖中從祀孔子廟庭詳人物傳

王觀字通叟與從弟覲從胡先生學於上庠詳人物傳

王覲字明叟清修簡澹喜愠不形詳人物傳

范公儀字祖威少同姪良傳游胡文昭公之門遂卜居其地

元陳應雷字道宏福建莆田人父肇衡尉如臯遂家於邑之下駕原應雷中延祐三年解元累官至平江路總管所在有惠政既致仕與鄉人講濂洛關閩之學儒林宗

如臯縣志

卷十六

列傳一

四十八

之明嘉靖間從祀鄉賢後裔秉鑑州司馬事孀母至孝不求仕進居鄉里好行其德秉鑑子常宸以貲八成均俱恪守先訓行義不怠人謂能繼武高曾云

明劉鉅洪武初舉經明行修科任本縣訓導講學於治東五十里臯人呼其地曰劉師舖

何瑋字粹夫號栢齋世爲何家堡人高祖忠一明初從戎遷懷慶父爲懷慶武陟人宏治辛酉瑋以懷慶衛籍舉鄉試第一壬戌登進士以翰林院庶吉士授編修正德初逆瑾竊政一日出龍川貢扇贈諸翰林時有人而長跼者瑋獨再揖瑾怒不以贈其受贈者復再拜謝瑋正色曰何僕僕至是耶瑾大怒詰其姓名瑋直前應曰編

修何瑭瑾愈怒欲害之瑭遂累疏乞歸瑾誅召還擢修
撰以直經筵觸忌諱調開州同知改東昌同知乞歸隱
居南村四方從學甚衆嘉靖改元起授浙江提舉副使
敦本尚實士氣丕變晉南京太常卿歷工戶禮三部侍
郎南京右都御史致仕家居究性命之旨行已教人切
近精實時以比之聖門由賜瑭性潔氣剛涵養和粹而
臨事毅然不可奪難進易退有高世之節卒贈禮部尚
書太子少保謚文定所著有栢齋集十二卷儒學管見
陰陽律呂管見行於世

許鳳號竹岡端凝持重究心理學爲海陵王心齋高弟著
言性錄一卷

如臯縣志

卷十六

列傳一

四十九

孫應鼈字山甫世家燕莊以貴州清平衛籍中解元登嘉
靖癸丑進士翰林院庶吉士改授給事中矢心獻納侃
侃不肯阿柄臣意嚴嵩劾之出爲江西僉憲歷按察副
使督陝西學晉叅蜀藩土酋薛兆乾以龍川叛鼈設方
略擒之柙送闕下奪蠻部而設版焉東川白蓮賊蔡伯
貫陷合州田純據定遠勢張甚三川幾搖中丞以鼈爲
左翼鼈夜領銳卒數百人設伏列萬炬鼓而進賊衆奔
潰斬獲數千級賊平晉按察使旋長楚藩再晉右僉都
御史鎮鄖陽累遷禮部右侍郎掌國子監祭酒事充經
筵講官上幸太學鼈進講無逸篇命坐賜茶又賜衣二
襲鼈適患鼻衄不能侍上講予告歸旋詔卽家起用工

部侍郎未幾晉南尚書且示嚮用鼇堅辭不行終於家
賜祭葬贈太子太保謚文恭臯人祀鼇學宮而清平別
有專祠墓在清平縣鳳皇山下

國朝劉道明字倬侯號仁寶掘港場人孝友性生舉止動靜
一於禮而不苟弱冠補博士弟子員致知力行毅然有
志於聖賢不徒以詞章之學博科名著書數萬言黜異
端崇正學尚論古今有體有用一時學者宗之撰原神
論合太極西銘之旨儀封張孝先梓其靈瑩集行於世
范方字令則文正裔孫自號葆樸子少遵父崇式家教端
言矩步以明倫敬身爲實學長益肆力古文粹然淵深
專宗韓柳著默鏡居文集二冊山陰趙錦園三韓周振

如臯縣志

卷十六

列傳一

五十

菴兩邑侯爲梓以行世又著詩傳聞疑二十二卷詩經
彙詁二十四卷同時韓慕廬陳椒峰黃仙裳張良御諸
先生僉云堪爲六經羽翼其性情澹泊寡營對之如飲
醇醪年逾八旬子安愚安素俱廩貢兼優文行安素子
昶由明經授翰林院待詔

章純仁字仁山居掘港場家世樸素仁質直負氣節讀書
窮理一準於程朱爲郡增廣生自號清溪處士鍵關績
學築別業於所居之後顏其齋曰讀書學道處時花課
子視一切利名泊如也見人慈愛恭敬恂恂似不能言
至關係名教議論持正不少屈著有毛詩點注四書劄
記近思劄記學者宗之稱清溪先生

錢珙字拱玉自少沈靜敦行不怠事母以孝聞爲文原本經術斥浮艷三薦不售筮之遇履之无妄謂門人曰履以兌遇乾乾爲君兌悅之五不應變而從木木遇金爲悔尅貞不售矣互而得家人家食之義也且其辭曰履道坦坦幽人貞吉我以功名故荒茲歲月曷若盡吾分內事履道而貞乎遂絕意進取與劉道明章純仁石京爲率真會譚性理往往發先儒所未發嘗謂孔孟只一權字權者仁之純義之精而心之用大學所謂至善中庸所謂時中也漢儒不識以爲反經而良知家專事心學又流爲虛寂權於何明何者爲至善爲時中哉壬辰居母喪哀毀致疾既祥乃瘞鍵戶著書嘗晨起默坐對

如臯縣志

卷十六

列傳一

五十一

周易或長歌歌竟起立日向夕忘食枝上禽鳴簾前花落俛仰之間油然陶然也壬寅以疾卒

吳峻字凌雲幼孤每早起侍父靈席前垂涕讀書母陳聞書聲亦起爲粥哺之而自績其旁寒暑無間後峻晚年五更必起蓋習久弗能易也學成補諸生食餼有司咸以國士目之顧數奇科歲錄計凡二十餘試靡不冠其偶賓興輒報罷自關東田書屋講學其中遠近負笈者數百人彈射文事利病迅若風埽靡不洞中癥瘕事母極孝教弟葵成名弟亦事之如師峻風神雅淡疎雋接人坦易然好持清議里中薄行者往往不畏父兄而畏峻知前後學使者十舉優行達其名於尙書省乾隆三

年督撫學使司道牧令咸薦峻孝廉方正疏其名於朝璽書褒美賜六品服辟用不出旋卒學者稱東田先生石鍾瑞字輯也乾隆辛酉科舉人農部石爲崧之次子也自孩提時卽知孰孝友至性過人農部家教嚴肅比長曾無子弟之過讀書靡所不究嘗云宏通博覽非止供臨文揮霍儒術中誠宜擇地自蹈孔孟堂奧程朱門戶敢不自勉耶補博士弟子員屢以優行爲學使器重居農部喪三年苦塊幾於滅性母衰病積孱親奉湯藥扶抱不假手婢婦盡瘁於帟帷者廿餘年泊居憂淚盡繼之以血兄恒事宦遊公私之費不繼瑞頻棄己產益之或諷以食指正繁尙稍留有餘爲贍給地瑞曰非不知

如臯縣志

卷十六

列傳一

五十一

自謀其如手足難愬視何竟以是盡蕩其家貲辛酉計偕北上貲用拮据既下第鬱鬱不得意將往兄恒官所疾作卒於孟津縣署年四十有四瑞氣質醇粹與人交輒傾肝膽遇緩急不惜罄囊應之暇則花間布席對酒論文招邀過從殆無虛日四方名士樂與之遊乾隆元年辟賢良方正未就歿後乾隆十年邑人僉議舉孝友儒行因崇祀孝弟祠著有賜經堂詩文稿行世

李泰字台吉江寧縣學前明直殿將軍瑞孫父國聘始遷居如臯之掘港場少攻文藝三十歲後厭棄科名勇於從道由釋老莊列等書悟入性理獨闢迷途取徑於劉仁寶靈瑩集太極圖集解精心理窟一以程朱爲宗由

富境而至極貧人不堪以終日者泰處之怡如也其器
量淵涵氣象醇茂有濂溪明道之風著蟻山學舍語錄
一卷輔仁山房講習錄一卷

陳謨字禹書號思堂弱冠遊庠食餼二十年以歲貢終天
性孝友處宗族鄉黨溫厚和平平居訥訥然如不出諸
口及論古今人物賢否事後當成敗波湧瀾翻四座皆
傾爲文根柢六經貫串百家雄深雅健學者翕然宗之
名流繼起多賴陶成其沒也門人史鳴臯輓詞有云人
範經師先生獨擅程化鵬有云鑄羣物獎寒峻行事昭
於一時文章傳於奕世人以爲允當偉幹修髯胸次灑
落而端正嚴毅人不能干以私蓋有道君子也

如臯縣志

卷十六

列傳一

五十二

顧鋼字南英號紫崖生而穎異初執筆爲文吐氣如虹人
以神童目之年未弱冠補博士弟子員旋食餼聲震膠
庠江南北諸名士皆接引恐後而心益謙學益力沉酣
經史貫串百家發爲文章無美不備宜取科名如操券
卒困棘闈屢薦不售主講席數十年生徒至數百人得
其緒餘登賢書成進士者指不勝屈鋼獨以明經終命
也年七十有三子三餘拔貢生任河南信陽州州判三
秀副貢生任直隸天津府通判崧文學生
顧鎔字大冶號藻如克敦品節學有根柢雍正己酉科舉
人丁巳會試中明通榜選宜興縣教諭門人湯先甲最
貧鎔竭力扶持飲食教誨由選拔登詞林其栽培寒士

類如此俸滿授貴州修文縣令地多寇盜有劉滿者積賊害民泣任旬日卽設法捕得之一訊服罪餘黨盡散百姓稱之爲神他若養士愛民諸善政載修文邑乘後以疾歸杜門課子孫孫履厚乾隆己酉科登賢書

范承宣字敬淑號南宮讀書慕古以忠宣希宣學業自期待融貫十三經科場作五經全題文由拔貢領鄉薦壬戌成進士任揚州府教授揚俗奢華以崇實黜浮維持風教在任二十年道接蘓湖寒峻多培植之兼課安定書院得士最盛如李道南王文治鮑之鍾嚴長明輩掇高科者數十人同年竇東臯先生有博學首登循吏傳清標坐鎮古揚州贈句學舍內築室供先人像讀書其

如臯縣志

卷十六

列傳一

五十四

旁每食必祭終身如一日遷德清令治尙簡清士庶歡騰以前任虛項賠累盈萬子徵銑百計憂勞幾於自盡尅日移那罄產完公清邑樂助者甚衆及歸家業蕭條著書設教怡然自樂足不履公庭銑事養無缺年八十五無疾終刻樂素堂制藝書法彙抄行世銑貢生現年七十八孫丹樹邑廩生闢梅花書室爲課子處從遊者多所成就蓋家學有淵源云

范曾輝字充光號實齋棠長子也幼穎悟讀書過目不忘研覈六經貫穿百家作爲文章超前軼後爲諸生時試輒冠其儕偶丁卯登賢書甲戌成進士年方壯盛正可翱翔仕途以親老奉養左右不求宦達終父母喪後杜

門課徒四方來學者日益衆以推闡經義爲宗以維持風教爲急陶冶薰蒸凡在門下大都皆敦品行而工文章其與人相接也無疾言遽色然不可干以私蓋有道君子也人無論識與不識皆敬仰之沒後門人稱文白先生著書數種行於世

叢合瑛字修五號誠齋歲貢生學宗儒先以正誼明道爲己任學博任之鏞號知人重其學行延主講席一時從遊諸生得聞緒論皆抗心希古克自樹立居平田化厥鄉人廉頑立懦薰其德而善良人稱之爲鄭公鄉焉著體仁錄四卷學略五篇道脈賴以不墜非徒摭拾古人餘論者也

如臯縣志

卷十六

列傳一

五十五

錢標林字梓蔭號翥寰才識敏悟淹貫經史諸子百家無不流覽常以古作者自命中乾隆庚午經元兩赴禮闈連薦未售里居教授生徒先德行後文學教授從游諸生皆黜華崇實根柢深固發爲文章蔚如炳如掇科第以去者十餘人事母孝年已七十時着斑斕衣學老萊子戲舞娛親行誼敦篤根於天性洽見博聞猶其餘緒云

史鳴臯字荀鶴號笠亭幼聰慧讀書目數行下初爲文豪宥有奇氣鄉先達胡夢白姜至山諸君子見其文咸驚異謂我輩當讓此人出一頭地入學食餼聲震江南北一時知名士皆樂與遊辛酉膺選拔甲子登賢書辛未

成進士授庶常明年散館改授知縣任浙江昌化令昌化有饑民以借糧滋事前署縣以盜論擬辟鳴臯憫之白上憲覆審得從輕擬結人稱慈惠調任象山度水勢爲蓄洩計修復高平賢昌兩硯民享其利無窮陞湖北黃州府同知以父憂歸服闋補廣西梧州府同知廉潔自守盡除陋規署柳州府知府承辦軍需幹練敏捷緣母老請養歸里邑中修城垣葺學宮賑饑荒諸急務皆首先建議指畫井井主雉水書院生徒至百餘人整頓士習文風丕振生平精書畫工詩爲文根柢經傳淹貫子史著作甚夥傳誦海內沒後鄉人稱文惠先生

程化鵬字馭青號培甫幼沈毅爲博士弟子時輒立志非

如臯縣志

卷十六

列傳一

五十六

法不言非法不行乾隆甲子登賢書辛未成進士任江西信豐廣豐瑞金縣令擢饒州府同知攝贛瑞袁三府篆撫民慈祥折獄明敏四充同考官所取皆名下士以母老請養歸里教授生徒嘗書坐隅飾外不失於人易反已無疚於心難卽此見先儒真實氣象劉相國石菴寄詩云政事文章古學者耆英碩德鄉先生其梗概可想矣

冒梁鎮字山民才穎異淹貫經史十六歲補博士弟子員試輒冠其儕偶卒困棘闈不得博一第人以數奇惜之事親孝弟嶠嶷皆早逝遺孤三教養成如己子生平無疾言遽色而嚴氣正性人所畏憚鄉黨中少年子弟

偶有過失密相戒勿使冒先生知也教授生徒以經術
爲根柢論文確守先正一歸理法同時如范曾輝錢標
林程化鵬輩悉互爲切磋出其門者爲文皆有法度艱
於嗣晚年乃舉子名方輝

胡之祁字京文號芸門由廩貢生中式順天癸酉科舉人
一時名公鉅卿重其博學能文皆樂與友故交遊最廣
選江蘇安東縣教諭以母憂歸服闋後選安徽太和縣
教諭課士勤勞論文以清真雅正爲宗諸生被薰陶文
體進而益上陞廣東英德縣令捐穀立倉弭盜安民多
善政生平於技藝無不精尤以作文爲樂遺稿數十卷
藏於家

如臯縣志

卷十六

列傳一

五十七

鄭韶字虞賓號芸書一字窳濱九齡失怙恃奉養祖母二
十二年未嘗一失老人歡遇父母生忌必廢餐飲泣純
孝出自性成自幼寡言笑淡嗜慾和平寬大着物如薰
貫徹經史工詩古文詞旁通書法奕理十九歲爲諸生
名驚老宿惜數竒南北闡屢薦不售年四十有七中己
酉

車嗣後無意科名以造就後學爲己任遠近從游食餼登
科者甚夥非惟脩脯不取有貧乏者反飲助之暇日開
詩社執牛耳一時名流爭過其門與人交不設城府生
平絕不道人短其居心醇厚仁恕尤人所難能捐買田
房協建祖廟家雖不甚豐嘗破數千金產脫人之厄無

論親疏急無不周有流離蒲上者出貲以養死則割地
塋之平時排解施與每以人情極難處之事而履險如
夷見人無德色退後無怨言雖事事受虧怡然弗計也
沒之日不獨士林悼傷卽輿隸臧獲輩無不唏噓泣下
嗚呼爲人若此庶乎近焉卒年六十三歲著有嘉蔭軒
制藝車中草心非草文集雙吹草黃山游草秋游草咏
古二百首養櫟山房存稿詩集雜著若干卷子四鐫鏤
銀皆蜚聲庠序銑戊辰

恩科捷南闈魁列

黃國豫字越艇號秋巖少負異才博學工詩喜作擘窠大
書曹地山宗伯目爲國士屢書徵入長安以母老辭不

如臯縣志

卷十六

列傳一

五十八

就父惕菴蚤卒母多病侍養三十餘年未嘗離晨夕鄉
黨皆以孝稱敦宗卹族篤交誼而矜尙風節雖城居足
蹟不入官府甲辰歲試郡沙籍占邑學額二名率邀同
學請於學使者復之至今仍其舊年七十五以明經授
揚州府訓赴任未幾卒士林悼之著有越艇全集四傳
精華海陽紀逸若干卷載藝文志其子端砥行力學亦
多所著作修邑志與爲分校者也

孝友

宋丁天錫赤岸鄉人性沈靜有器識博學能文父蚤卒奉母周至孝有盜入其家以兵脇母天錫身衛母曰寧殺我所有任取之盜亦自慚曰天不殺孝子於是母子獲全治平四年母病革語天錫曰死生人之常也况年九十又何憾已引聲浩歌而終親歿喪葬一稟於禮終身衣不純采歿祀鄉賢祠事詳王觀所撰墓誌

嚴希孟沿海鄉人嗜學能文父文式蚤卒事母李盡孝元祐三年母病店醫禱弗愈密封股炊糜以進母病遂痊越六載母歿哀毀如禮居喪三年未嘗見齒鄉人語曰嚴家孝子無雙

如臯縣志

卷十六

列傳一

五十九

錢渚字申伯翰林學士勰之孫也家貧而豐於養母居喪哀毀骨立廬墓三年

史聲沿海鄉人元祐間以進士登顯官始家貧失母帶經樵蘇以給父養而自甘糲食時抱慙也及授官迎養中途聞父訃卽跣奔四日至喪所慟幾絕扶襯還葬結廬墓旁躬負土培墓成壟如山遇弔者惟觸地叩哀而已

明桑永父榮陷大辟永詣闕請身代上憫其孝併釋之改戍邊衛時號孝子軍許主事孚贈以詩有捐父生身代父身之句後孚以靖難飲醜死忠臣孝子並著一時云

吳儒白蒲鎮諸生也性至孝嘉靖中父殯在堂而倭突至人狂走避去獨儒苴杖守棺哀號弗輟倭以刃加其頸

弗爲動倭知其孝子也力引之去出門復還守如初倭繼至者相視捉鼻授以號帶後來羣倭見帶卽舍去時倭所過多焚殺唯儒家獲全

姚山掘港人年十三父病革晝夜悲號焚香籲天割股肉作羹啖之父疾愈居常得異味必懷歸遺父父或與人競則號泣諫止父故業屠山踞哭請易其業父從之比長補弟子員孝德益著居喪遵禮言笑不苟蚤卒士林惜之

嚴正父怡宦十五年廉無所遺又性好客客至輒留飲正時時質衣物治具極驩而罷父病侍左右衣不解帶者累月及歿哀毀幾殆出必告遺像而行母弟客死間關

如臯縣志

卷十六

列傳一

六十

百狀竟持其喪歸撫諸遺孤猶己子前後有司皆表其門

李宗渤字迴瀾父知忠母許孺人年十二母病刲股以進負鉅創血涔涔下卒不令家人知後十年宗渤染重疾垂絕復甦姑溪之巫曰病人有裹創帛藏某櫃中爇灰飲之當愈啓櫃則削與悅在焉如巫語而疾愈

顧昇居縣東三里種蔬養母孝謹備至母疾嘗欲刲股以進母禁之而止及母亡水漿不入口者三日自恨前志未酬必欲從母地下一夕竟自經於塚前事在萬歷丙

辰秋

耿明仕邑西村農家子也父潢病膈噎諸藥不療明仕焚

香夜禱割股進之潢病尋愈又有夏承宣者亦農家子
父禹年病寒症垂絕承宣禱於神割肉作羹年不能啖
僅啜其汁而甦事俱在萬歷丙辰冬

婁如崙以母洪病亟顛天請代自割股啖母母病旋愈異
日母復病崙弟如嶺亦以股肉進時人稱曰雙孝先是
閭左有何材者亦以割股聞至今稱何孝子

旌表孝子許文炳字玉宇鴻臚寺序班母蔣守節耄年足
不履地文炳出入扶持不離左右蔣患背疽文炳以口
出膿血不嫌穢汚瀕危將刲股娣泄其事於母母責以
大義乃止日夜號泣燃肌禱天願減已算以益母壽母
病旋愈後居喪泣血三年未嘗見齒崇禎庚午建坊旌

如臯縣志

卷十六

列傳一

六十一

之題曰一門節孝今祀忠孝祠

國朝許石陞字元文幼喪父事母陳氏奉甘旨承色笑朝夕
勿懈陳教子最嚴嘗曰汝能力學成名卽孝矣石陞益
發憤讀書爲邑諸生值母病革石陞焚香祝天割股和
羹以進母疾立愈

吳維翰字周遣父世家早逝母劉氏撫之成立弱冠補弟
子員以孝聞雨憲燈案續父所著廣益遺篇每掩卷揮
淚不減王元偉讀蓼莪時乙酉初偕母避亂隱居蒲村
十畝桑田僅供饘粥布衣蔬食安貧樂道宴如也母歿
居喪哀毀後遂謝浮名遠聲色與緇衣黃冠爲伍每逢
親誕日忌日必齋戒涕泣以祭焉

范端字簡夫生有至性事父母純孝年十五時侍母盧宜人疾湯藥必親嘗時盛暑衣不解帶兩閱月爲文顛天願以身代夜分獨起設香案於堂前覓刀割股而家人窺知之藏匿金刃乃於厨下得久棄鈍刀割不得下負痛就階石磨之聲霍霍然封翁驚醒出視之已再割矣相持痛絕作羹啖母病以愈歲餘乃卒端居喪盡禮哀毀動人服闋補弟子員旋食餼才敏學贍挾策遊京華受知於宗相文肅公薦登仕版筮仕河南儀封令廉明愛養利興弊革薦舉卓異歷陞東兗郡丞勵精河防任滿力求終養藉內轉遂歸省之願侍養三載溫清定省無少懈已復起補計部郎以父憂歸居官居鄉狷介高

如臯縣志

卷十六

列傳一

六十一

潔一塵不染與弟相友愛士大夫皆矜式焉

冒丹書字青若郡廩生憲副起宗之孫司李襄之季子也崇禎末年賊陷襄陽憲副適受監軍之命誓以身殉司李號泣請於長安諸公乃得解任歸憲副易簣時呼兩孫嘉穗丹書至榻前手勒十字曰爾父天生孝子不可不學兩孫敬受教庚申秋賊挾利刃突入襄家丹書赤體護父賊不能近身受四創父因得脫人稱至孝云丹書工制舉業及詩歌古文詞困頓未第以明經授州同知非其志也有枕煙堂卯君詩再生稿西堂詞諸刻旌表孝子徐宏成字自西邑附貢生父勅隴州同知母沈安人宏成性仁厚兒時嬉戲不肯傷蟲蟻六歲師授小學及

古忠孝事類必振襟聽受十歲喪父擗踊哀號寢食盡
廢事寡母沈養體養志歲製衣襦藥餌以救貧病母日
誦陀羅尼經夜分登樓拜禮三辰宏成衣冠侍立琉璃
光下十餘年如一日康熙乙酉正月母中寒疾勢甚篤
宏成遑迫醫藥禱祀無寧晷食飲不下咽母死號哭嘔
血殞而蘇者再積十三日亦卒遺命以衰服殮葬母側
子建中既長以其事上有司雍正戊申

詔下旌其門學使者張廷璐過如臯弔以詩云摧心風木報難伸
泣血依然孺慕眞地下相從成孝子庭中立槁繼先民
詩書已見貽謀善綸綉還膺錫類仁爲景儀型勤採訪
輶軒頻駐古淮濱吟罷憮然題臯魚至性四字於華表

如臯縣志

卷十六

列傳一

六十二

而去建中醇謹嗜學與吳峻石鍾瑞同以孝廉方正辟
不就

旌表孝子石京字天中方亂定省有常度若夙習者父泮游學
廣陵疾篤京聞徒跣往家人以幼止之號哭不聽晝夜
行三百里亟趣舟扶父歸抵里越日得終於寢京勺水
不入口四日祖母敦譬親持粥銜泣命啜之京復哀悲
欲絕已爲強進半盂許母張哀悼成疾京晝夜不眠顚
天愿以身代母素苦飲藥每跪奉床下母哀其志强服
之母竟卒痛不欲生祖母劉亦傷懷不已京懼改戚容
事之夜則嗚嗚泣簟爲之漬逾二十年劉卒哀毀骨立
杖而後起居廬三年不脫衰裳每忌日輒哀痛不食初

父疾革語京曰祖遺產當盡讓兩叔予躬耕雖無多畝足供汝朝夕他日兩叔必欲均析之京愀然曰父命也乃相與推爲公儲以贍其族舅氏張錫九家貧無子京絡繹致遺靡間歲月錫至八十餘出一冊謝京曰爲若著錄存之計千餘金矣又浙東潘冰壺執友也寓臯邑貧甚京以時周給歿復割田葬之京少工文爲諸生不遇鍵戶撰述用丹黑筆作小楷蠕蠕盈幅成籍者幾滿一乘四十餘年絕跡公庭婦女童稚咸知孝子名臚其事詣有司請旌京聞謝曰予罪人也何可以父母市名涕泣固辭乾隆二年有司卒上其事

詔建坊旌其門今祀忠孝祠子大鐘鑑鑣維量皆恂恂謹飭克荷

如臯縣志

卷十六

列傳一

六十四

門業

冒寰璋字季昭貢生起年嗣子起年卒無嗣妻鄒愛其賢立之母邁危疾醫者難之璋每夜焚香祝天願減己年益母壽忽棟間生芝香滿一室母病霍然愈遠近異之邑令李振奇親詣其室慰獎之贈以至孝通神額時祖父母俱慶糗餌之屬必手調以進昕夕未嘗離左右兩老人安焉又迎養本生父母於家喪葬悉盡禮宗黨交稱璋沒後邑人許嗣隆等白其事於督學旌之曰純孝可師子勗別有傳

鄭勳號克襄別號贊菴由弟子員貢入成均候選學正喜讀書期爲實踐之學不屑屑舉子業有至性七歲時遇

喪親者求櫛不可得卽解所佩銀百練與之歸語其母
母爲嘆異母錢氏大京兆淑湖公女孫康熙九年嬰未
疾鑿藥無效勦號泣籲天刲股以進母病愈後三年歿
哀毀過禮廬墓守制未嘗一窺內戶執父喪亦如之爲
人慷慨好施鰥寡孤獨有以饑寒告者必厭所欲改鎮
之延嬰堂爲育嬰延嬰者接嬰兒送縣收乳之育嬰則
收育於鎮可免道途寒暑之虞以此全活者不可勝計
兩弟皆通籍季得京職俸入不給時時周恤之婚嫁其
子女如己所生老而鰥居惟以義方訓諸子皆迄有成
立他無問也年七十有五考終牖下贈奉政大夫山東
濟南府同知從長子大毅所居官也次子臨候選鑾儀

如臯縣志

卷十六

列傳一

六十五

衛經歷皆別有傳季子大綸官陝西隴州知州有循聲
羅世德字清臣家馬塘場雅仗名節善讀書母疾劇醫告
術窮世德遑遽夜叩天刲股肉膾而進之母尋愈嘗慨
末流侮老凌長悉由宗法不明爲建家廟以睦之又嘗
造石橋以利涉者年八十五卒事詳鹽法志

馬日修字天爵母柩在殯鄰火延及居宅日修抱柩痛哭
人力挽之出不聽忽一青衣人冒火入曰爾後余前昇
以出急從之果昇柩出叩首以謝不知所之矣九十六
老人許瑤述其事

張嘉譽字蘭畹赤岸鄉人性至孝宗族張思遠張芳裔紳
士冒天錫陳謨史策石升等詣縣舉嘉譽孝行有云父

病而誠求北斗延壽一紀有奇親葬而獨守西阡廬墓
三年之外前令陳文海給匾旌之

朱龍雲字雲車父道坤力學早世母吳多病病時龍雲割
股和藥以進母病以瘳旣而病復作且劇醫家診之爲
肝疾投藥輒不效龍雲頓念以肝益肝當得愈遂剖左
腹割肝肝寸許墜地上血溢如泉仆地氣絕家人驚扶
之少甦開目戒家人勿言促令炙肝進母母病良已龍
雲亦以善療創尋愈異哉孝之所感微矣哉事至奇理
則正也事在康熙庚午邑令王公所陬以至誠感神額
旌之詳請司院飭照揚州蕭孝子曰曠例立祠春秋致
祭孫搢廩生請于督學夢公麟給以孝心獨苦拊祀忠

如臯縣志

卷十六

列傳一

六十六

義孝悌祠其族曾孫大剛彙刻百餘年來海內歌頌孝
子詩文爲孝行紀實四卷

梅嶺北郭人事母至孝母多病嶺侍奉湯藥衣不解帶動
息不敢離一日出門乞藥餌比歸則母已溘逝嶺痛母
之亾已之弗能視瞑也仰天大號躍起尺有咫足抵地
如墜巨石俄而顛仆聲頓漸人驚掖之而氣已絕視其
履履底俱脫矣聞者無不哀之邑紳士並爲詩歌紀其
事

鄭藻字文江天性純孝隨父母赴姊之夫徐炘署署夜半
火起勢已烈藻倉卒奔至不知父母之已出也冒火尋
救父母自外急呼之出則遍體灼爛顧甚喜喜親在忘

其痛也而創已甚翼日遂卒 忻悲之爲徵詩授梓以傳焉

程國寶字楚善博學工文以家貧親老棄舉子業效白圭計然術營貲財以供 灑濕 抑搔備極孺慕有兩弟終身歡愛析箸時器具田宅自取敝陋蓋深念鞠子哀友于弟者睦親族卹孤寡天性敦篤嘗錄先儒格言旣自勵亦以訓後人於司馬溫公朱文公語手錄尤多子化鵬進士官江西饒州府同知化鶚庠生

冒有萊字 儀號北山貢生候選州判時

憲皇帝開保舉例學士任蘭枝以才具優長堪 牧令薦揀發粵

西因母老泣請終養與弟有慶有筠依依膝下母氏顧

如臯縣志

卷十六

列傳一

六十七

而樂之性嗜古書畫風致 然

朱昂字衡峰號岳西需次州同知爲人坦白簡易有孝行父瀛病篤禱於神願以身代及父沒泣血三年哀毀骨立見者動容撫兩弟友愛周至故人有遺孤幼而貧爲延師訓誨學成登鄉薦親戚躉者解囊助之至於修學宮葺書院及掩骼諸事當事均延爲董事倡首興舉不遺餘力子洪壽官湖南江華縣錦田寨巡檢鄭人瑞字五雲號可山需次州同父大毅官濟南司馬母未偕留侍母左右承歡以孝著父沒課兩幼弟選國瑞讀書勤而有法後選卒勸督猶子韶益切韶以己酉中副車瑞嘗欲建宗祠忽攫疾以沒子畹繼志建祠焉未

幾亦卒嗣孫錕邑庠生

石中錦字燦文性純篤母顧病刲股和藥進未瘳繼母徐
病革復刲股以進病旋愈邑人姜恭壽徵詩傳其孝
范元敬字鳳三號薛堂父病革割左臂入藥密自纏裹夜
仍侍寢榻及旦家人見堦除血痕疑焉強解衣視之餘
血猶浸漬襦袖間乃相與驚歎母徐早世迎徐之母養
於家始終無情容事繼母朱竭力侍養曲得歡心與兄
元琳友愛最篤丙子歲饑友人死貧無以殮元敬方抱
病且時值拮据猶貸金助之篤行君子也子輅乙未進
士官四川長寧令

冒邦彥字英三號印山歲貢生父瓚以公罪徙豫省母隨

如臯縣志

卷十六

列傳一

六十八

往祖車書年已邁家無儋石儲邦彥資館穀奉養甘旨
無缺能得祖父歡祖歿邦彥數往豫定省父母以家累
不得留父卒於徙所訃至晝夜奔赴痛不欲生哀毀骨
立方謀歸里母又病尋卒邦彥益哀拮据萬端扶兩櫬
以歸營墓田喪葬盡禮以一寒苦儒生而能如是禮有
曰竭情盡慎致其敬而誠若其邦彥之謂乎著印山詩
文各若干卷存於家子玉錕附生玉鐘廩生玉鎔增廣
生

沈爲樑字杏堂號雲巢候選州同樸村次子幼嗜學長隨
父任佐理政務諳吏治顧性恬淡不慕仕進居鄉恂恂
郵宗族敦睦嫻有古君子風事母以孝聞尤篤友于兄

爲棟令秦中因公賂累樑變產數千金代繳得免議尋擢府倅卒于任樑跋涉三千里迎兄喪歸葬年六十艱子嗣是歲舉一子卽嗣兄後兼承已祧足徵孝友之報云邑中公事無不共相爲理同人尤稱之

沙樹榆字憲杜號定齋考授州同知卽鄭志所載人物傳內躍其之仲子也母梁先後早謝世常恨孝養未盡逢誕日忌辰家祭後必至墓所涕泣悲悼孺慕終身無改兄弟十人榆居中友恭內多所曲全昆弟分析後有蕩鬻田園者榆出貲償其值而仍令取息以贍其身事度母蒯尤能全父未竟之志里黨有困乏加意賙卹遇公事如修學賑荒皆竭力勉副史笠亭太史作傳藏於家

如臯縣志

卷十六

列傳一

六十九

教子孫讀書長子熙忠有聲譽序幹練老成惜未能展次子熙惠成童卽失怙秉性純厚事諸兄友以全孝一如其父因小試入成均以績學未遂顯揚一子增齡督課甚嚴弱歲遊庠屢試冠軍辛酉得選貢因父諱本科未與

廷試服闋補考卽回里攻苦益深亦復恂謹人以爲孝友之報云

馬大良字白颺號山子歲貢中式順天鄉試己酉科舉人生而岐嶷髻鬣能文父雖晚年得子而督課甚嚴故弱冠游庠食餼庚辰年母陳氏病篤割股奉藥得痊後遊燕京名噪藝苑著有自怡齋文集

忠烈

明朱顯忠有勇畧洪武初從征澤潞平原有功授濠梁衛指揮僉事四年從潁川侯傅友德克文州遂留守之未幾僞夏平章丁世真誘合番寇數萬來攻力戰卻之僞帥趙復與世真攻城城中食且盡外援不至部衆咸勸忠姑棄城徐圖之徒死此無益顯忠厲聲曰爲將守城城存與存城亡與亡豈有怕死將軍耶詰旦攻益急顯忠悉出兵東門拒戰世真復攻西門日且暮顯忠被傷裹創力戰城破死之事聞遣使賜祭一壇贈鎮國將軍都指揮使仍厚卹其家

許孚字恒二世爲蘇州震澤人元末隨父媵七避亂如臯

如臯縣志

卷十六

列傳一

七十

遂家焉舉建文己卯鄉試爲方正學所得士靖難時官工部主事榷蕪湖關聞金川失守方殉節北向再拜泣曰吾師獲死所矣憶吾始獲售試題爲託六尺之孤榜首劉師目爲鳥中孤鳳孚不敏竊附劉君後敢負所知哉遂痛哭飲酖死

許直字若魯父邦靖直幼績學鏗刻課文不當意輒蒙被卧不食登崇禎癸酉賢書甲戌成進士出湛持文先生門先生贈朱提書格二美其端方不踰尺寸也除浙江義烏令以母憂歸哀毀骨立寢泣柩旁茹蔬三年服闋補惠來縣舟行入境見一稻秀河中異之拔視乃出一尸鼻孔中卽尅期捕何道秀竟得之吐情實置於法惠

來大旱直深自咎責閉城隍廟門與神約三日不雨焚其廟夜夢神告曰已得請於帝當先雨萍後乃雨兩直以語人不信越日果符其言以治行第一擢吏部主事晉員外郎杜苞直絕請託清通簡要名震京師甲申流賊薄都城直約同官爲死守計貸金饗士無何城陷人莫知帝所在喧傳帝南遷直急變服往甫出門見賊衆充斥卽返曰事勢至此出將安之我上英明肯隱忍播越以貽國羞乎俄聞帝崩直大慟曰國亂不匡君危不濟吾惟一死而已客羊君輔李羽中泣謂直曰父老子幼天下事未可知語刺刺不休直瞑目不應已執客手曰老父自幼以忠孝爲訓今君死臣生爲老父辱不忠

如臯縣志

卷十六

列傳一

七十一

卽不孝君母復言乃北向拜君南向拜父秉燭作絕命詩六章又作書寄父出銀書格一囑寄老父以遺孫子曰此十年前吾師閣學文先生所賜曩乏斥其一留此不可不珍也以好語慰二客去復語僕曰翌日若從間道速歸勿少留呼一僕隨入寢室取麻練命作環僕戰愕涕泣不止叱之出扃戶自經死一手持練尾一手上握凝然懸室中越三日乃殯面色如生崇禎十七年三月十九日也年四十有四初諡忠節

國初

賜諡忠愍特祠祀焉

繆九鳳字鳴岡號威仲生平尚氣節博學師古年十二遊

鄉校由選貢中庚午癸酉兩科乙榜釋褐授於潛令時
年未及冠體清羸如童子於潛掾吏羣謁於里第九鳳
緋衣烏帽出廳事羣吏以其齒稚有慢容九鳳危坐正
色訶責之吏咸畏服履任視事精明通敏以和出之民
被其澤擢瑞州府同知屢署太守監司事皆能其官時
值軍興羽書旁午裁決如流而自視欲然國變棄官不
知所往其家人亦無還者

國初籍其田宅入於官

李之椿字大生號徂徠新泰令上林孫光祿署丞伯龍子
也神彩奇麗志意介然萬歷壬戌登文震孟榜合王遂
東倪鴻寶黃石齋王覺斯爲天崇五才子由行人選入

如臯縣志

卷十六

列傳一

七十二

司勳曹甄奇錄異人不敢干以私以直道取忌見謫蕭
散夸曠與伯氏道生倡和霞起園天下慕其風流福藩
立南京起璽卿督糧浙東鼎革解官自歸而難作以藏
故明勅印未繳逮獄論流順治六年下

詔書曰勝國初亡人人未免有故主之心况居官食祿者乎凡順
治五年以前犯者勿作叛論罪旣雪卽擔簦入武爨山
後中蜚語復被收門戶憤裂宗族毀敗繫之石城獄中
遂絕粒勺水不入口積十四日而死弟石生奉

旨釋歸

許德溥字元博父國欽母前死事後母以孝聞初喜讀周
鍾文及聞鍾從賊卽唾罵燬其稿元博有宗人直者殉

國難元博壯其節嘗追慕不衰初聞北京破痛哭數日
不食聞揚州破又痛哭數日不食後以髻首其思明狀
論死

顧春臺失其名聞國變同妻女赴水死

官隸章姓失名國變攜妻女投水死

國朝冒重光字御六少隨父渾之蜀軍門奇其才擢用之隨
奮威將軍岳鍾琪征羅卜藏丹津重光間道走西寧偵
得賊情虛實歸命爲前鋒勦熟當十二部落勝之是時
加爾多阿牙子哈隆謨斑嗎牙最梟重光請曰沙漠迷
漫非嚮導不能前金川瓦刺熟番可使請往調焉其酋
長驕甚曰坐碉樓笙歌宴飲重光仗劍入語曰奉命徵

如臯縣志

卷十六

列傳一

七十二

調來幾日矣留不遣何也酋慙伏卽舉三千以從番故
不按紀律重光斬一人以徇無敢不用命者乃會大軍
深入斬阿牙子哈隆謨手办斑嗎牙丹津以數騎遁去
閱數日獲丹津姊甥三人於枯布又獲散卒三十餘人
於花海子又獲其黨洪台吉於哈嗎兒打撒悉縛詣軍
門西路平時南坪營羊崗番猶相爲犄角重光單騎入
寨曉以大義誅賊首怕拉雙務塔南路亦平大將軍次
第軍功以重光最遂選充侍衛逾月擢薊州都司遷固
關叅將五閱月授河州副將

寵賚甚渥河州地逼邊陲番民交錯保安堡土酋王喇夫旦素負
固倡諸屯並噶楞畢堂逆番騷擾土門積石間居民苦

之重光奉檄統西涼三鎮官兵勦撫乃先攻李計二屯
生擒王喇夫旦而噶楞畢堂相持不下一戰大破之斬
首千餘級生擒百餘人噶楞畢堂平脫吳二屯以次納
欵焉是時寧遠大將軍將用兵伊犁謂重光曰吾得子
共事帷幄吾無憂矣己酉夏六月大將軍出塞檄重光
督軍需兼領車兵赴營途次拜

上特賜花翎蓋異數也十一月屯兵巴里坤擬來秋大舉渡伊犁
河直搗準噶爾策楞巢穴領五營及各路官兵簡閱訓
練眠食都廢力疾視事軍吏請節勞重光曰我從行列
超擢至此敢愛身耶遂卒於軍營

優卹加總兵官喪車出巴里坤將士悉白衣冠哭送之乾隆間

如臯縣志

卷十六

列傳一

七十四

賜祀昭忠祠五十九年

特賞世襲恩騎尉嘉慶八年

勅建昭忠祠於通州祀之本邑忠孝祠亦祀焉